

東
華
續
錄

東華續錄

乾隆八十四

臣王先謙敬編

臣周瀚蕃恭校

秋七月辛未諭軍機大臣等據勒爾謹奏甘省續得雨水情形一摺但稱六月二十日省城續獲甘霖入土深透於秋禾大有裨益而於被災各屬得雨是否有濟及見在作何籌辦撫恤情形均未提及著傳諭勒爾謹遵節次所降諭旨將皋蘭等屬此次曾否一體得雨能否稍資補救及見在勘辦災務情形若何卽速由驛奏覆慰朕廑懷至另摺覆奏收捐監穀一事稱被災二十九州縣均係一隅偏災非普被災傷可比若槩令停捐必需撥運未免需費不貲等語既有此情形自當酌量妥辦但須實心籌畫不使糧價過昂致妨民食又據奏籌辦貧民出口墾種一事尙未能得要領

因思小民易與樂成難與圖始本屬常情總須令其自知新疆一帶
有自然美利到彼耕作即可共享豐饒如山東百姓之趨赴口
外雖禁之不止方爲妥善若如所稱咨行新疆大臣查明地畝若
干可以安插窮民若干詳細咨覆一面設法曉諭再行陸續送往
小民見係官辦尙似驅令遷移卽一時勉強相從仍不能冀其源
源樂赴此時籌辦之始止可詢問貧民有願赴新疆墾種而力量
不給者官爲資送不露強迫情形向後願往者多可不煩資助方
爲經久良法再傳諭勒爾謹等另行熟籌妥辦仍將如何設法便
民之處據實覆奏將此由五百里傳諭知之○王申諭索琳不勝
尙書之任著降補理藩院侍郎仍帶革職留任所遺理藩院尙書
員缺著伍彌泰補授○癸未大學士禮部會議朝鮮國王之如金
氏奏請追賜故世子李緯實諡及故世子婦趙氏誥命與例不符

應毋庸議得旨朝鮮國王李吟已故長子李緯前經封爲世子因其早逝未及襲爵今該國王如金氏請以世孫李祘襲封國王因爲故世子李緯陳請追賜封典照例議駁固是但念其以宗統繼序爲請情詞懇切揆之禮制事屬可行著加恩照所請給與爵諡詔命該部遵照辦理以示朕優恤藩封之意○遣散秩大臣萬福內閣學士嵩貴賜祭故朝鮮國王李吟諡莊順追賜故世子李緯爵諡恪愍封世孫李祘爲朝鮮國王敕諭曰皇帝敕諭朝鮮國王世孫李祘覽奏爾祖王吟薨逝朕心惻然據王如金氏奏稱爾自幼聰明性敦仁孝夙有長人之德爲國人所願戴請冊承襲朕俯順輿情特允所請茲遣官齎詔誕告爾國封爾爲朝鮮國王繼理國政封爾妻金氏爲國王如佐理內治並賜爾及如誥命彩幣等物爾宜永矢靖共懋績承於侯服迪宣忠順作屏翰於天家爾其

欽哉毋替朕命故諭○丁亥實授巴延三山西巡撫調鄂寶爲湖南巡撫

八月庚戌移駐沙州副將都司於安西以安西參將守備駐沙州俱改隸肅州鎮○乙卯 上自避暑山莊巡幸木蘭行圍○丙辰禁各省文武衙門豫印空白○定考選世職及軍政考試均射三箭例○丁巳諭朕每歲木蘭秋獵先期駐蹕熱河數十年來見該處戶口日增民生富庶且農耕蕃殖市肆殷闐儼然成一都會惟絃誦之風未盛由於口外人多樸魯無所師承且未另立學額更無以示鼓舞因思熱河各廳所屬編氓及僑居年久者其子弟應不乏秀良誠能教育而振興之未嘗不足以造就自宜初設義學延師課士以勵文風並當建立學官酌定庠額俾得藉以上進其如何興建籌辦各事宜著該督周元理悉心勘議具奏至學校

章程並著會商學政羅源漢酌議奏聞副朕嘉惠塞民廣學毓材至意○己未給葉爾羌等處成丁回人耕地○庚申諭軍機大臣等向來各省苗民雜處地方如湖廣鎮筵寧貴州古州俱曾有漢奸滋事因設文武大員彈壓不許漢奸潛入苗地其餘凡有苗疆省分例禁俱嚴但恐奉行日久地方官視為具文見已另降諭旨命各該督撫留心整飭矣至川省近年來如僭拉之虎兒促浸之張坤忠俱以該省民人潛竄其地構釁滋事則漢奸之尤甚者今兩金川全境蕩平兩逆犯又俱就獲誅磔自皆稍知畏憚但川省民情狡黠喜事及貿易人率多習為番語與番蠻聲氣相通易於竄入滋事卽如布拉克底巴旺綽斯甲布三雜谷等處未必不有內地民人在彼第此時大功初蒞兵威震疊自當以鎮靜為主不宜因此稍露端倪然亦不可不隨時稽察豫防其漸著傳諭將軍明

亮總督文綬均各留心實力整飭總宜不動聲色妥爲料理仍將如何籌辦之處卽行覆奏○是月大學士管兩江總督高晉江南河道總督薩載奏查勘銅沛廳屬韓工內係石岸岸內有越隄足爲保障與其用料鑲修莫若放淤可期一勞永逸督令於埽工第三段開挖進黃溝槽工尾挑挖出清溝槽於八月初八日開放甚爲妥順俟內塘淤平埽工卽可無庸再修得旨知道了此猶小喜若陶莊引河成而溜走北竇大喜朕誠望之爾等於何時興工何時放溜也

九月丙子 上駐蹕避暑山莊○丁丑吏部等部議准盛京將軍弘昫奏鳳凰岫巖二城事務責令岫巖通判管理興京一城事務歸興京通判專辦無庸旗員經營從之○己卯諭前因郭羅克賊番殺害青海公禮塔爾一事派理藩院郎中阿林前往四川會同

該省派出之保甯府知府倭什布及參將李天貴至番地諭令該土司等將兇犯吹斯枯爾拉布坦等勒限全行拏解今據明亮等奏即中阿林等勒拏兇犯僅據該土司瑪克蘇爾袞布等稟稱吹斯枯爾拉布坦逃避無蹤將其寨房拆毀搜獲犯屬男婦九名口及牛馬等物解送懇請撤回官兵寬限擒拏等語所辦大謬已傳旨嚴行申飭矣阿林等派往該處董司緝犯之事理應督同該土司到處搜拏將兇犯緝獲方可完案乃惟憑該土司一面之詞及綠營虛誑惡習輒思遷就了事甚屬不堪阿林倭什布李天貴俱著交部嚴加議處○諭軍機大臣等明亮等奏即中阿林參將李天貴知府倭什布前往郭羅克勒拏兇犯據該土司瑪克蘇爾袞布等稟稱吹斯枯爾拉布坦逃避無蹤將其寨房拆毀搜獲犯屬男女九名口及牛馬等物解送懇請撤回官兵寬限擒拏隨令阿

林等回赴省城。辦將官兵暫撤。揀派熟諳夷情備弁一員暗駐境上。嚴督該土司偵拏兇犯等語。所辦大謬。已於摺內批示。郭羅克境壤有限。吹斯枯爾拉布坦等雖欲逃匿。諒未必遽能遠颺。李天貴倭什布係該省派令專辦之員。阿林由京派往該處。董司緝犯之事。理應督同該土司到處按拏。將所有地界徧行親歷。兇犯一日不獲。阿林等一日不回。官兵等一日不撤。該土司自不敢以誑言欺飾。乃阿林等惟憑該土司一面之詞。妄以殺人首犯誘之。綽克宗加爾又云。其已經墮殞身斃。更屬死無證見。且言吹斯枯爾拉布坦等查無蹤迹。僅將犯屬解送。率請撤兵。寬限。明係該土司狡詐遷延。有何難察。至所云該土司欲跳河自明。心迹經把總攔救。尤必無之事。此乃緣營虛誑。惡習何足爲憑。番性素不肯輕生。卽如索諾木等經大兵圍困。勢窮力蹙。尙欲偷生。乞命該員等

並未將土司逼迫何至欲自投河尤可見其虛誕至所稱賊番係該土司部落之人雖恐不無代爲隱庇今旣拆毀賊番所住碉房獲其家屬牛馬其悚懼實屬真情等語更不成話碉房雖拆何難再砌其家屬止係婦女幼孩並無成丁之犯而殺人兇犯僅獲其賊何兄示儆卽頂經誓呪尤番人狡獪長技如何可信至該土司願出銀一千兩賠贖服罪尤爲不成事體幸而仍飭發還若再收之不更貽笑柄耶總之撫馭番人之道懾以威嚴則皆畏服聽命待以姑息必致玩忽生心從前兩金川之事實由川省歷任督提優柔遷就釀成事端遂致大費兵力多費帑金又得阿桂堅心籌辦不避艱險經五年之久始得埽穴擒渠今大功甫竣正諸番膽喪之時而在土境勒緝殺人兇徒並非難事自當嚴切督捕使番眾技無可施罪人斯得庶可懲一儆百共知震懾天威永靖邊徼

乃當功成之後初辦此事卽受該土司欺哄遽撤官兵草率完局
眾番又將毫無忌憚必以爲天朝雖設鎮安營董以大員彈壓不
過仍循故轍郭羅克旣以詭譎獲免無事眾皆尤而效之設或綽
斯甲布各土司復有類此者又當如何辦理抑似前此之養癰貽
患乎此案阿林李天貴倭什布承辦勒緝兇犯之事輕信該土司
虛語據以稟告惟圖將就了事甚屬不堪已另降旨交部嚴加議
處至明亮等不察委員等庸懦無知之見竟爾撤回官兵置之不
辦實大不是文綬桂林知識短淺且蹈外省積習無怪其然明亮
舒常帶兵征勦有年習聞朕之訓諭且深知阿桂實心督辦軍務
不稍假借因得成功豈尙茫無定見不思效法且明亮舒常朕特
委以管轄諸番理應持正今一事如此其淺見可知尙安望其能
整飭制馭使羣番敬畏乎並著傳諭嚴行申飭據伊等奏稱官兵

暫撤賊番聞事寢息勢必回覓舊巢土司得以分頭密捕是縱之適所以擒之不致稍有漏網較之守候緝拏似更妥速等語試問伊等撤兵以後該土司果如所計獲犯縛獻尙可若此旨到時仍然無獲伊等又何言自解乎朕前因阿林李天貴倭什布往彼勒緝兇犯半年有餘未見覆奏深知該委員等之無用會諭令派查禮前往妥辦此事今阿林等果不出朕所料至前旨由六百里發往距今已逾二十日明亮等早應接奉何以尙未覆奏豈因有此奏妄思允准完案遂意存觀望耶此事責成明亮等四人妥速勒緝要犯務獲毋任免脫稽誅如一年之內不能獲犯卽明亮等亦當從重治罪將此由六百里傳諭知之仍卽將查禮會否派往及見在如何籌辦之處迅速覆奏○庚辰 上恭送 皇太后回鑾

○辛巳諭吏部議奏嗣後直隸州知州一項請於各部院京察保

送引見准其一等之主事等官內出具切實考語保舉引見按班
升用一摺所議尙未允協六部主事分辨部務有年事多諳練京
察時經該堂官保列一等必擇其才猷卓越之員以之升補直隸
州知州自堪勝任至太僕寺等衙門主事及與主事升轉相同之
經歷都事寺丞署正等官平日本無事可辦遇京察之年該堂官
止就其循分供職者列爲一等充數實非六部主事可比一旦驟
膺直隸州知州之選必致竭蹶貽誤阿林卽其驗也且六部堂官
眾多就本部滿漢主事內甄覈保舉原可得人若小衙門堂官不
過數人且係三四品京堂其保舉本不能如六部尙書侍郎之明
公且所屬主事等員數無多不過因地取材安能名稱其實從前
御史陸秩條奏吏部議准均屬姑息未妥豈宜復沿其誤嗣後直
隸州知州缺止應於六部京察一等滿漢主事內保舉引見記名

銓用其小衙門之主事等官槩不准其升用直隸州知州如有京察保列一等者止可令其改用六部主事如外省調繁之例以資造就諒此等閒曹散秩擢用部員未必能遽膺上考設其中果有才具出眾之員在部復經保列一等者原未嘗不可錄用庶於慎重吏治甄拔人才之道均爲有益其如何酌定章程之處著軍機大臣會同行在吏部另行妥議具奏○壬午以梁敦書爲福建按察使

由湖南長寶道遷

○癸未諭刑部進呈秋審招冊朕詳加披閱內浙

江僧靜峰起意毆死其俗家胞弟周阿毛圖賴刑直武等一案照故殺期親弟妹律擬絞監候又江西省郭義培謀財殺死小功堂姪郭丫頭子一案照尊長謀殺本宗卑幼已殺者依故殺律擬絞監候雖皆擬入情實而所引之律俱未允協僧人披剃出家卽不當復論其俗家卑幼且致人命卽已犯其殺戒今靜峰因周阿毛

癡呆無用輒行謀死圖賴洩忿兇殘殊甚彼既不念手足之誼何得復援尊長之條刑部所以引此者因律有爲僧於本身親屬有犯仍按服制定擬等語遂爾槩行比附殊未思律言有犯專指尊長而言如僧人犯其祖父伯叔自不可因已出家稍爲末減若卑幼本不可言犯又安得由犯尊長之律推而下及乎是僧人致死俗家卑幼斷不當復以服制論也至郭義焙因其六歲幼姪郭了頭子頸戴銀項圈輒行起意扭取見其哭喊遂行推跌糞坑溺斃兇惡殘忍情殊可惡且該犯意在圖財視伊姪如草芥盜攫而殘其命於死者恩義已絕又豈可復引謀殺卑幼之條乎夫尊長之於卑幼或不遵教誠或干犯名分實打致斃本律原止擬流若因財產起釁則不得槩用此律從前曾降諭旨敕部準情定擬是以有兄及伯叔因爭奪財產將弟姪故行殺害者擬絞監候一條然

此亦第專指尋常索財爭產因傷斃命而言蓋弟姪原有贈給尊
長之義故尊長之罪尚可稍輕若謀財害命及強盜得罪致死弟
姪更復有何倫理以及圖姦卑幼之妻復將卑幼謀殺者此等兇
徒身已蔑倫傷化定擬時轉因倫紀原情又豈明刑弼教之本意
乎朕辦理庶獄鑑空衡平輕重悉視其人之自取而於秋讞大典
披覽再三期於無枉無縱若此二條舊例尙未合情理之正著刑
部另行改議具奏以昭平允○甲申 上自避暑山莊回鑾○丁
亥諭據劉秉恬富勒渾鄂寶桂林奏稱川省辦理軍需蒙發帑金
六千餘萬之多凡例准開銷者見在隨案覈銷其與例不符應行
刪減者約計千百餘萬除於承辦各員名下追賠及該管上司分
賠外爲數尙多擬於川省養廉內扣半攤賠猶恐歸結無期帑仍
懸宕請令各直省督撫以下州縣以上等官於應得養廉酌扣十

分之三代爲賠還不出十年即可全數完結等語所奏大非無此辦法朕征剿兩金川之故因其係服屬土司敢於負恩抗拒吞噬鄰封實爲邊圉之患勢不得不行剪除五年以來朕宵旰運籌調兵裕餉幸將士宣勞用命埽穴俘酋大功告成爲一勞永逸之計卽用數千萬帑金朕心原所不惜但須覈實報銷使用項悉歸有著不得謂之妄費若貪劣之員藉端侵冒自爲法所必誅設其中有因軍務緊急趨辦過費致踰成額難以按例准銷者如果覈實奏聞未嘗不可格外加恩寬免卽如站員冀國勳承辦糧臺諸事濫用無度至於累萬盈千法司議以大辟擬入秋審情實朕猶念其訊未入己且究因急公所致是以句到時並未予句亦可知朕辦事進情酌理務期至當而不肯稍有偏倚矣今劉秉恬等乃因軍需奏銷例應刪減者多恐帑項懸宕欲令各省將養廉酌扣攤

賠所見鄙謬不能深體朕意至於如是乎夫金川事務係四川一省之事若因經手之人辦理不善致多糜費於各員名下追賠並著落該上司分賠歸款理所宜然或因為數過多於通省養廉分年攤扣尙係就川省以完川省然朕猶以為各官養廉扣至一年辦公不免拮据且事屬已往後任何事而令其代為前人賠累亦未平允並恐川省各官所得者少不足以養其廉致有黷貨病民之事更滋流弊近經降旨與劉秉恬等矣至各直省官員與此事尤毫無干涉顧可從而波及之乎且如軍行所過省分一切皆官為資給絲毫不擾閭閻雖用兵而人不知兵朕之體恤下情若此其周且至安肯以軍需無著之項貽累宰士臣工乎況此次軍需共發帑六千餘萬兩刪減卽至千百餘萬不過十分之二方今府庫充盈並不必急欲歸還此千萬之數若劉秉恬等所奏竟似因

軍需費多而令天下官員公同填補成何政體乎昔康熙年間江西藩庫虧帑二百餘萬兩部臣議請賠究 皇祖諭云此必因朕屢次南巡墊用之故朕爲太平天子省方觀民卽動帑金以供巡幸亦無不可毋庸追賠究治煌煌 聖訓人皆感誦今朕因征剿叛番綏靖邊徼致費帑項豈不能效法 皇祖之槩行寬免乎劉秉恬等係朕特派會同該督文綬等覈辦軍需奏銷大員惟應各發天良將用過軍需各項徹底清查覈實銷算以次題結通計准銷者若干應刪減者若干分別明晰勿使稍涉蒙混至於刪減之項總不離各站員經管伊等支領收放俱有冊檔可稽其實用多寡難掩眾人耳目劉秉恬等在軍營董辦糧運年久亦應早有見聞若有站員於事後浮冒捏開查無確據卽屬藉端肥橐或將官銀私自花費膽敢侵蝕軍需其罪實浮於冀國勳卽當查明參奏

必不姑寬勿使貪劣之員得以侵帑倖免若有因軍需緊迫必需多費以免貽誤查係眾見確鑿實有憑據如冀國勦之數者雖與部定之例未符而其急公之心可諒不當治罪並不當復向追賠該侍郎等卽當據實奏聞候朕施恩豁免但不得因有此旨輒思將劣員侵冒妄費之項濫行涸入以圖掩蓋彌縫爲邀譽市恩之事非特難逃朕之洞鑒卽伊等撫心自問亦恐爲天理所不容矣至所奏各省攤扣養廉之說斷不可行將此明白宣諭使咸知朕意劉秉恬富勒渾鄂寶桂林均著嚴飭行並通諭中外知之○己丑諭韋謙恆前在護貴州巡撫任內因蘇場侵貪一案不卽揭參尙非大過伊係翰林出身學問亦優著加恩賞給編修在四庫全書處行走○庚寅 上奉 皇太后還京師○丙申諭刑部審訊宗室穆騰額因身有服制未束黃帶路遇正紅旗蒙古施氏之僕

七兒等錯認爲相識之人欲同飲酒穆騰額不允七兒等遂將伊衣服撕破一案將七兒定擬具奏宗室覺羅分至尊貴束紅黃帶以別常人理宜自尊體統乃棄紅黃帶不束使人無從識別辱由自取宜加重懲嗣後宗室覺羅等犯罪之時如束紅黃帶者依宗室覺羅例辦理如未束者卽照常人治罪永爲例著宗人府曉諭知之○刑部議奏嗣後殺一家四命以上致令絕嗣者兇犯凌遲處死其子無論年歲擬斬立決妻女發伊犁給厄魯特爲奴若死者有子嗣卽將兇犯子擬斬監候秋後處決妻女給死者家爲奴如死者家不願收領卽改發伊犁給厄魯特爲奴從之○戊戌諭兩金川喇嘛均係邪教不便仍留其地但番人習奉佛教該處獨無喇嘛似非從俗從宜之道應於噶拉依美諾兩處酌建廟宇卽於京城喇嘛內派往往住持所有應派人數著理藩院議奏其建

廟事宜著文綬妥酌辦理

冬十月辛丑諭向來各省督撫例進方物如雲南產雲石福建柑
橘荔枝之類隨所產陳獻仍不外乎任土作貢之義乃閱時既久
督撫等踵事增華卽有購覓古玩充貢者其始因恭逢 皇太后
七旬八旬萬壽大慶及朕六旬萬壽各督撫備物以申忱悃尙非
過分伊等遂習焉不察於每歲萬壽年節亦一例呈進朕因其旣
已遠致不得不量收數種以聯上下之情其實內府所藏古器珍
玩何物不有豈藉外閒貢物以爲觀美且伊等進到者仍充宴賚
分頒之用今積久愈多又豈宜復今日漸增益乎朕簡任封疆大
臣委以地方政務惟視奉職程其殿最豈因進貢衡其短長卽如
總督中惟高晉不令屬員代辦而伊所進貢品亦不及他省眾所
共知朕因其平日實心辦事不愧封疆之寄特加恩用爲大學士

恩眷獨優亦眾所共知者不更可曉然於朕意之所在乎乃伊等不能善體朕意專以此爲誇多鬪靡甚無謂也況古玩非布帛菽粟可比飢不可食寒不可衣本非貴重之物而一經各省購覓市僧卽從而高價居奇其閒自行售辦者固亦有之而令屬員代備者恐或不免並有以多報少略領價值以爲逢迎結納之具此於吏治大有關係不可不防其漸至在京臣工如王公及頭品大臣前因聖母及朕躬萬壽准其呈進慶祝貢品今亦每年踵以爲常相率效尤實所不取且每逢慶節之前反覺繁冗可憎又何益乎至藩司尤係不應進貢之人近亦有於陛見時面爲陳懇者朕因業已加恩擢用難以槩行屏卻遂亦許其呈進略爲量存一二究屬非體又如內廷翰林於年節書寫詩冊詩扇及春帖子恭進分所應然又何必以購及古玩爲事耶至近日人情漸趨於華殊

失淳樸之意昨偶閱熊學鵬家入官物件內有珠繡蟒袍此必伊任巡撫時所辦或備而未進或進而未收俱未可定此等費工價而不適於用朕甚鄙之因卽以賞人並未留御猶憶 皇考時怡賢親王曾進珠繡黃褥當卽飭訓並 諭其過當朕遵守 家法宮中服御從不用及珠繡又如象牙織簾工巧近俗又不平滑便用遠不及尋常茵席之安適因亦擯而不用久有旨弗許再進卽此亦可知朕之好尚矣嗣後各省督撫除土貢外毋得復有進獻在京王公頭品大臣及內廷翰林等亦當一體遵照並將此通諭知之○壬寅諭諸王襲爵經朕酌定由軍功封晉者世襲罔替其餘恩封諸王襲爵時皆應以次遞降又念親王郡王以下不過六七傳卽至奉恩將軍心有不忍曾經降旨凡親王以次遞降者至鎮國公而止郡王以次遞降者至輔國公而止其公爵均著世襲

罔替蓋襲爵延恩若不定以等差則國家億萬年之久王爵愈積愈多又不免於冗濫昨四庫全書薈要處呈進繕本宋史朕幾餘披閱見宗室世系表內其燕王楚王之子卽降爲公公之後降爲三班奉職是其再傳而後卽已下同齊庶視見今所定恩封之親王郡王以次遞襲者仍得世膺公爵其厚薄爲何如耶且朕於諸子中惟皇長子皇五子皆因病劇時始加封親王至於皇四子皇六子則以出嗣諸叔得襲郡王爵餘尙未有特予冊封者非朕沾名而薄待己子正因理當然耳所以昭示久遠之道無有大於此者我世世子孫所當遵守勿替著將此旨錄示阿哥書房並諭令宗室王公等知之○癸卯諭據鑲白旗滿洲都統奏稱戶部郎中西蒙額呈送伊子原任兵部筆帖式阿爾泰不守本分日入醉鄉口稱放火殺人種種妄爲請將阿爾泰發遣並審訊錄供奏聞等

語西蒙額呈控阿爾泰乃以父控子有何屈抑卽有屈抑審明後反坐伊父之罪乎抑將伊子寬免乎竟可不必如此究訊若係繼母於伊夫亡故後呈控前妻之子恐有冤抑研究辦理尙屬可行如西蒙額以父控子似此審訊殊爲過當西蒙額之子阿爾泰卽著照伊呈送發遣嗣後如有父送子者卽照所控辦理不必審訊

○甲辰以奎林爲理藩院尙書○乙巳諭遣派宗室族長揀同族大員補授○戊申左都御史張若淮以病乞休允之○己酉諭知

府直隸州將生死出入大案審出實情改擬得當者送部引見著

爲令○辛亥調崔應階爲左都御史以余文儀爲刑部尙書德保

署福建巡撫

由署吏部左侍郎署

○壬子阿思哈因病解任以鄂寶爲漕運

總督○癸丑以敦福爲湖南巡撫白瀛爲湖南布政使馮廷丞爲

江西按察使

由福建臺海道遷

○乙卯諭據曹學閔奏請禁水煙一摺雖

屬無關緊要但火煙已屬無益因相沿日久未便飭禁今更流爲水煙尤非所宜著交步軍統領衙門暨五城御史槩行禁止並著甘肅等省一體飭禁○丁巳諭漕運總督阿思哈老成勤謹宣力有年擢任總漕方資倚畀前以喘疾陳請解任會降旨准令回京調理以冀就痊茲聞溘逝深爲軫惻所有伊歷任降革之案俱著加恩開復其應得卹典仍著該部察例具奏尋予祭葬諡莊恪○己未諭前因刑部奏審訊周升桓不將秦廷基收禁致在寓自縊一案廣德於審訊此案時默無一語竟若置身局外因降旨傳諭廣德令伊據實明白回奏茲據廣德奏稱當日隨同熊學鵬審訊此案熊學鵬會將摺稟給令閱看廣德以秦廷基身爲監司大員有心徇庇屬官膽敢通同作弊擬以大辟本不爲枉乃熊學鵬所擬罪名同一斬候而必引用交結近侍之例轉似牽強會與撫臣

辨論等語所奏甚屬取巧此案業經文綬將訊問熊學鵬供詞奏覆據稱當日提訊秦廷基時原係率同蘇爾德廣德周升桓審訊我問擬秦廷基死罪原向司道說知廣德說秦廷基雖奉旨革職加倍治罪不至於死蘇爾德俱是知道的等語茲廣德何以又稱會向熊學鵬有秦廷基徇庇屬員通同作弊擬以大辟本不爲枉之言顯屬有心取巧看來此案非熊學鵬廣德到案三面質對難成信讞熊學鵬業已拏問起解在途廣德身爲臬司豈能無罪著革職來京質訊著吳虎炳派委妥員將廣德迅速押送進京所有廣西按察使事務並著吳虎炳於道員內遴選一員奏明署理另候諭旨○庚申以彭理爲廣西按察使

由湖南岳常道道遷

○辛酉山西巡撫巴延三奏太原縣西五里有風峪口兩旁俱係大山大雨後山水下注縣城猝遇水災恐捍禦無及請自峪口起開河溝一道直

達於汾所占民田計止四十餘畝太原一城可期永無水患得旨
嘉獎○乙丑諭原任吏部侍郎加尙書銜吳紹詩老成謹慎宣力
有年前歲以老病乞休准其回籍頤養今春東巡時尙能遠出迎
轡特晉階以示優眷方冀其延享遐齡不意遽爾溘逝所有應得
卹典著該部察例具奏○減秋審朝審緩決三次人犯罪○旌六
世同居江西峽江縣監生蕭習舜

十一月己巳朔吏部議准署雲貴總督圖思德奏曲靖府屬五嶠
通判向隸廣西府因廣西改州通判歸曲靖府轄五嶠距曲靖八
站查察難周請裁通判改設直隸州判隸廣西州從之○庚午諭
邁拉遜見署工部尙書其吏部侍郎尙未開缺仍著兼辦吏部侍
郎事務高樸係兵部侍郎兼署禮部侍郎今派往葉爾羌將瑪興
阿換回瑪興阿到京後卽著以禮部侍郎兼署兵部侍郎至高樸

起程以後瑪興阿未到京以前所有禮部侍郎事務著景福兼署
兵部侍郎事務著阿肅兼署○設熱河等七廳學額○丙子調永
慶爲浙江按察使梁敦書爲湖南按察使以奇寵格爲福建按察
使

由糧驛
道遷

○庚辰諭朕御極之初大學士等奏請避朕名朕以避

名之典雖歷代相沿實乃文字末節無關大義特降諭旨遇朕御
名上一字少寫一點下一字將中間禾字書爲木字以存其義至
臣工命名有相同者槩不令改易彼時趙宏恩曾請改避亦未允
行若二名不偏諱聞之孔子而嫌名不諱則韓愈諱辨言之甚詳
是以朕於御名同音之字凡臣工奏對俱不令迴避眾所共知至
於清字既不可缺筆而十二字頭之字本少每一字必對音數字
至十餘字不等與漢字嫌名無異更何必諱乎卽漢字亦有不能
盡同者如永字世所習用而體義亦不宜缺筆縣字爲民生衣被

常稱尤難迴避且皇子輩永字乃 皇祖欽定皇孫輩絛字則朕所命名而近派宗支蕃衍依次取名者愈久愈多我世世子孫自必遵朕舊章不令改易第恐後來臣工等不能深體朕意妄謂於心不安輕有所請或致無可適從自當豫示折衷以垂法守朕以爲與其改眾人之名以避一人之名莫若改一人之名使眾無可避較爲妥善將來繼體承緒者惟當以永作顯以綿作夏則係不經用之字缺筆亦易而永絛等字均可無庸改避至於清文則仍其舊總不必改避其奕輩以下則所謂過此以往朕未之或知然亦可推廣此意永遠遵行此旨著軍機大臣敬謹存記並繕錄二道一交內閣封貯一令阿哥等於書房恭貯敬識朕常有願使春秋八十有五卽當歸政至時再行宣示○甲申諭前因彙輯四庫全書諭各省督撫徧爲採訪嗣據陸續送到各種遺書令總裁等

悉心校勘分別應刊應鈔及存目三項以廣流傳第其中有明季諸人書集詞意抵觸本朝者自當在銷毀之列節經各督撫呈進並敕館臣詳悉檢閱朕復於進到時親加披覽覺有不可不爲區別甄覈者如錢謙益在明已居大位又復身事本朝而金堡屈大均則又遁迹縑流均以不能死節覲顏苟活乃託名勝國妄肆狂信其人實不足齒其書豈宜復存自應逐細查明槩行毀棄以勵臣節而正人心若劉宗周黃道周立朝守正風節凜然其奏議慷慨極言忠盡溢於簡牘卒之以身殉國不愧一代完人又如熊廷弼受任疆場材優幹濟所上封事語多剴切乃爲朝議所撓致使身陷大辟嘗閱其疏內有灑一腔之血於朝廷付七尺之軀於邊塞二語親爲批識云觀至此爲之動心欲淚而彼之君若不聞明欲不亡得乎可見朕大公至正之心矣又如王允成南臺奏彙彈

効權奸指陳利弊亦爲無慚骨鯁又如葉向高爲當時正人頗負
重望及再入內閣值眾閹弄權調停委曲雖不能免責賢之備然
觀其綸扉奏草請補閣臣疏至七十七上幾於痛哭流涕一槩付
之不答則其朝綱叢脞更可不問而知也以上諸人所言若當時
能採而用之敗亡未必若彼其速是其書爲明季喪亂所關足資
考鏡惟當改易違礙字句無庸銷毀又彼時直臣如楊漣左光斗
李應昇周宗建繆昌期趙南星倪元璐等所有書集並當以此類
推卽有一二語傷觸本朝本屬各爲其主亦止須酌改一二語實
不忍並從焚棄致令湮沒不彰至黃道周另有博物典彙一書不
過當時經生家策料之類然其中紀本朝事蹟一篇於李成梁設
謀碁害具載本末尤足徵我朝 祖宗行事正大光明實大有造
於明人而彼轉逞謀陰計以怨報德伏讀 實錄我 太祖高皇

帝以七大恨告 天師直爲壯神戈所指肇造鴻基實自古創業者所莫及雖彼之臣子亦不能變亂黑白曲爲隱諱存其言並可補當年紀載所未備因命館臣酌加節改附載 開國方略後以昭徵信近復閱江蘇所進應毀書籍內有朱東觀編輯崇禎年間諸臣奏疏一卷其中多指言明季批政漸至瓦解而不可救亦足取爲殷鑒雖諸疏中多有乖觸字句彼皆忠於所事實不足罪惟當酌改數字存其原書使天下萬世曉然於明之所以亡與本朝之所以興俾我子孫永念 祖宗締造之艱難益思兢兢業業以祈天而永命其所裨益豈不更大又何必亟毀其書乎又若彙選各家詩文內有錢謙益屈大均輩所作自當削去其餘原可留存不必因一二匪人致累及眾或明人所刻類書其邊塞兵防等門所有觸礙字樣固不可存然止須刪去數卷或刪去數篇或改定

字句亦不必因一二卷帙遂廢全部他若南宋入書之斥金明初
入書之斥元其悖於義理者自當從刪涉於詆冒者自當從改其
書均不必毀使無礙之書原聽其照舊流行而應禁之書自不致
仍前藏匿方爲盡善著四庫館總裁等妥協查辦黏籤呈覽候朕
定奪並將此通諭中外知之○丙戌晉封貴人鈕祜祿氏伊爾根
覺羅氏俱爲嬪○戊子諭昨閱國史館進呈徐治都傳伊在湖
廣提督任內攻勦叛賊頗著勞績得有雲騎尉世職因襲次已滿
查銷著加恩仍賞給伊家世襲罔替至徐治都之妻許氏當吳逆
犯順時率僕禦賊中破身死義烈可嘉著交該部補行旌獎○壬
辰調朱椿爲廣西布政使孫士毅爲雲南布政使○甲午諭軍機
大臣等據刑部奏駁李質穎咨稱革監倪宏文除欠嘆咭喇國夷
商噶等貨銀萬餘兩無還問擬杖責未協議將倪宏文改擬杖流

監追一案已依議行並明降諭旨將李侍堯申飭李質穎交部察議令將倪宏文家產變抵仍勒限一年監追再照部議發遣如該犯限滿不完卽令該省督撫司道及承辦此案之府州縣於養廉內照數攤出並傳朕旨賞給該夷商收領歸國以示體恤矣此等夷商估舶冒越重洋本因覓利而至自應與之公平交易使其捆載而歸方得中華大體若遇內地奸民設局賒騙致令貨本兩虧尤當如法訊究乃李質穎僅將該犯擬以薄懲而欠項則聽其自行清結所謂有斷無追竟令外洋孤客負屈無伸豈封疆大臣懲惡緩違之道幸而刑部奏駁朕始得知其詳爲之更正若部臣亦依據葫蘆照覆其錯謬尙可問乎中國撫馭遠人全在秉公持正令其感而生畏方台政經若平日視之如草芥任聽地棍欺陵而有事鳴官又復袒護民人不爲清理彼旣不能赴京控訴徒令蓄

怨於心歸而傳語島夷豈不輕視督撫鄙而笑之且或慮粵商奸
惡致呼籲仍復成空將來皆裹足不前洋船稀至又復成何事體
且朕此番處置非止爲此事蓋有深慮漢唐宋明之末季多昧於
柔遠之經當其弱而不振則藐忽而虐侮之及其強而有事則又
畏懼而調停之姑息因循卒至釀成大變而不可救宋之敗明之
亡皆坐此病更不可不引爲殷鑒也方今國家全盛諸屬國震懾
威棱自不敢稍生異志然思患豫防不可不早杜其漸嘆咭喇夷
商一事該督撫皆以爲錢債細故輕心掉之而不知其所關甚大
所謂涓涓不息將成江河者也朕統御中外一視同仁如內扎薩
克諸藩恭順誠服其輩行本小朕皆撫若兒孫每至必歡欣踴躍
與舊滿洲蒙古之執役無異卽新附之準夷回部年班來者朕亦
必聯之以情待之以禮厚其餽資而遣之眾亦莫不懷德感恩幾

與內扎薩克相等此皆內外臣工所共知者卽如伊犁與哈薩克
易馬一節辦理亦須妥善或哈薩克所驅至者本不皆善馬原不
妨如法擇而取之若旣是可用之馬卽當按其所值與之市易始
能經久無弊設或所給段匹輕薄暗減其價致所得不償所售哈
薩克貿易已非一日皆能悉其底裏口卽不言而心豈能允服旣
違立法通市之本意其流弊且無所底止朕每以此廬懷該伊犁
將軍不可不實力妥辦以裕永遠之規若聽其日趨日下而不知
返朕一有所聞惟該將軍是問恐不能任其咎也又如朝鮮安南
琉球日本南掌及東洋西洋諸國凡沿邊沿海等省分夷商貿易
之事皆所常有各該將軍督撫等並當體朕此意實心籌辦遇有
交涉詞訟之事斷不可徇民人以抑外夷卽苗疆番境諸省亦當
推廣此意妥行若仍視爲具文再有此等事件一經發覺或經朕

訪聞及爲言官糾劾必將該將軍督撫重治其罪不能似此案之
僅予議處也將軍督撫皆朕委任之人惟當善體朕意毋怠毋違
自可寓久安長治之計卽我世世子孫敬體朕訓守而勿失億萬
年無疆之慶詎不在是耶此旨著傳諭各將軍督撫一體遵照並
著入於交代令各後任永遠遵行勿稍玩忽並另錄一分交上書
房俾皆恪循罔懈○丁酉諭朕恭閱 實錄當 太宗文皇帝時
王貝勒內卽有懶於騎射之事今承平日久想諸王中亦必有廢
弛者我國自開基以來首重騎射理宜恪遵舊典服習勤勞卽如
朕每歲行圍猶能於馬上馳射此乃眾所共見者著通諭阿哥諸
王各宜懍遵 祖訓黽勉奉行億萬年傳之子孫毋替

十二月庚子諭昨閱江蘇所進應毀書籍內有朱東觀選輯明末
諸臣奏疏一卷及蔡士順所輯同時尙論錄數卷其中如劉宗周

黃道周指言明季秕政語多可採因命軍機大臣將疏中有犯本朝字句酌改數字存其原書而當時具疏諸臣內如王永吉龔鼎孳吳偉業張習彥房可壯葉初春等在明已登仕版又復身仕本朝其人既不足齒則其言不當復存自應槩從刪削蓋崇獎忠貞卽所以風勵臣節也因思我朝開拓之初明末諸臣望風歸附如洪承疇以經略喪師俘擒投順祖大壽以鎮將懼禍帶城來投及定鼎時若馮銓王鐸宋權謝陞金之俊党崇雅等在明俱曾躋顯秩入本朝仍忝爲閣臣至若天戈所指解甲乞降如左夢庚田雄等不可勝數蓋開拓大一統之規模自不得不加之錄用以靖人心而明順逆今事後平情而論若而人者皆以勝國臣僚乃遭際時艱不能爲其主臨危授命輒復畏死倖生覩顏降附豈得復謂之完人卽或寸長足錄其瑕疵自不能掩若旣降復叛之李建泰

金聲桓及降附後潛肆詆毀之錢謙益輩尤反側僉邪更不足比
於人類矣此輩在明史既不容闕入若於我朝國史因其略有事
蹟列名敘傳竟與開國時范文程承平時李光地等之純一無疵
者毫無辨別亦非所以昭褒貶之義若以其身事兩朝槩爲削而
不書則其過蹟轉得藉以掩蓋又豈所以示傳信乎朕思此等大
節有虧之人不能念其建有勳績諒於生前亦不因其尙有後人
原於旣死今爲準情酌理自應於國史內另立貳臣傳一門將諸
臣仕明及仕本朝各事蹟據實直書使不能纖微隱飾卽所謂雖
孝子慈孫百世不能改者而其子若孫之生長本朝者原在世臣
之列受恩無替也此實朕大中至正之心爲萬世臣子植綱常卽
以是示彰瘝昨歲已加謚勝國死事諸臣其幽光旣爲闡發而斧
鉞之誅不宜偏廢此貳臣傳之不可不覈定於此時以補前世史

傳所未及也著國史館總裁查考姓名事實逐一類推編列成傳
陸續進呈候朕裁定並通諭中外知之○辛丑諭軍機大臣等圖
思德奏探聞緬酋憐駁已死及關外信息等因一摺此事非圖思
德所能辦已於摺內批示矣看來圖思德之意頗以憐駁之死爲
幸妄冀緬匪一事即可從此完局此非曉事之見也緬甸數年以
來並未實有悔罪輸誠之舉雖內地嚴守關隘不與貿易恐亦有
名無實未必能制其死命總之若不將拘留內地之人送還及實
在進貢乞恩斷不能准其開關通市其局不能完結轉不繫乎憐
駁之死與不死恐緬酋狡詐異常從前曾經捏報憐駁已死日久
乃知其詐此次安知非其故智復萌卽或果有其事而其子不能
改父之過又與憐駁何異圖思德此時惟當靜聽並不必遣人向
關外探訪彼處信息爲其所愚使賊匪從而輕笑設果得魯蘊親

自到關懇請通貢圖思德竟當明白開導諭以汝果出於誠心竟宜親身進京朝見大皇帝如能將楊重英蘇爾相諸人全行送回並誠懇納貢大皇帝不但准汝仍通貿易並且格外加汝大恩汝若不親去本督部堂難以代汝轉奏至於中國撫馭外夷全恃威信從不肯賺其入而置之死卽如秤管猛到京數年今仍遣令歸巢皆汝等所深悉者且使果欲殺汝亦非難事汝旣已親來我等總督提督見在邊境皆可執汝誅之又何必俟汝到京再辦汝當反復自思若非親自叩覲大皇帝此事斷不能完如汝驚疑顧慮不敢進京本督撫亦不相強卽令汝回去亦不代汝奏聞如此曉諭察其神色卽行據實奏聞候朕定奪此時緬酋處如差小頭人到關惟當諭以汝等之言不足爲憑如果有誠心懇請之處可令汝大頭人等自來本督部堂另有諭示之語若彼投遞緬字文稟

總須付之不答仍將原稟馳奏將此由六百里傳諭知之○癸卯
諭觀保在上書房行走有年尙屬小心勤謹今聞其患病溘逝著
加恩給還左都御史原銜○命戊戌年八月舉行繙譯鄉試次年
三月舉行會試○丙午命明亮軍機處行走○丁未諭軍機大臣
等據李侍堯奏商船莫廣億帶到暹羅國搭送回籍雲南人楊朝
昂等三人並鄭昭文稟一件稱因連年與緬匪仇殺再懇賞買疏
磺一百擔若天朝用兵阿瓦願懇諭知其期豫爲堵截緬匪後路
詢之楊朝品等均據供似屬真情等語楊朝品等出邊雖在未經
用兵以前但以內地民人赴緬甸貿易曾被拘禁復又轉入暹羅
在外年久自不便遣回騰越著李侍堯派員將楊朝品等三犯解
京沿途小心管解勿致疏脫俟解到時訊問明確再行辦理至鄭
昭見內地民人在彼卽行資助送回尙屬恭順前已准其所請聽

買硫磺鐵鍋此次請買硫磺仍可准其買回看來鄭昭與緬子仇殺似非飾詞但中國見在並不征勦緬匪卽欲埽除醜類亦無藉海外彈丸協擊或伊欲報故主之仇聽自爲之李侍堯仍倣上次檄臺之意給與回文可耳將此由五百里傳諭李侍堯知之○庚戌准滿洲侍郎年至六十者乘轎○乙卯諭御史炳文奏請嗣後科道京察止令都御史帶領引見去留俱候欽定一摺所奏殊爲錯謬科道職司言路遇有內外大臣贓私不法及吏治民生所繫如果確有聞見原准其自行具摺據實糾陳朕必徹底清查覈實辦理是國家待言官之道已屬從優但旣歸都察院統轄則當京察激揚大典自應聽該堂官考察以符體制且科道等平時言事其識見孰優孰劣朕原可約略而知至其才具之短長行走之勤惰非堂官不能深悉若不令其甄別註考槩候朕於引見時裁定

有是理乎設或京察時都御史舉劾不公科道原可指名參奏乃
炳文於舉行京察之前輒思變更成例妄爲此奏使堂官不得操
其黜陟明肆阻撓隱占身分冀諸事得以自專其有關於人心世
道者良非淺鮮明季臺諫諸臣遇事生風紛呶不已遂至黨同伐
異貽害無窮最爲彼時秕政我朝綱紀肅清科道咸知奉法不敢
復蹈覆轍惟雍正初年因六科改隸都察院給事中等逆章爭競
經 皇考嚴加懲儆力爲整飭益復謹懍恪遵至今乃炳文此奏
借慎重言官考覈爲由欲翻堂官考覈成例效明末諫垣門戶惡
習此風斷不可長况炳文身係宗室尤不應爲此沽名之事豈可
復爲御史炳文著卽革去御史發往伊犁以司官效力贖罪將此
通諭知之○諭據署伊犁將軍索諾木策凌奏稱哈薩克布魯特
等惑於經文妄生疑懼惟祈永爲臣僕不遭屏棄等語看來以朕

適滅金川恐一併及彼故假借經言託詞嘗試此蓋不知朕撫恤
伊等之意天朝之於外藩恭順則愛育之鴟張則剿滅之兩金川
負朕深恩恣意欺鄰並思窺伺內地是以明申天討擣穴擒渠哈
薩克等內附多年頗爲恭順豈有無故屏逐之理今特降旨曉諭
阿布賚阿布勒比斯等嗣後但益加恭謹以期永受朕恩毋滋疑
慮○丙辰諭軍機大臣等圖思德奏緬目得魯蘊遣人投遞緬稟
情願送還內地官人輸誠貢象懇恩賞准開關已飭該鎮州給與
回文等語所辦大段尙是前經該署督奏探聞緬酋情駁死信並
得魯蘊欲親來還人納貢懇通買賣等因已將辦理此事關鍵詳
悉傳諭圖思德遵辦矣情駁之死信眞僞無關緊要如果匪酋等
有悔過輸誠之意將拘留之蘇爾相楊重英等盡行送回並誠懇
進貢原亦可以完局但此說止可存之於心斷不可於緬眾前稍

露天朝有趁伊等投誠速圖了事之意賊匪狡獪異常儻窺見內地有欲圖遷就情形彼必以爲奇貨可居轉多稽阻若見督提等不以爲事處之淡然彼或具有真誠必急切懇願欲冀俯納中國撫馭外夷之道大率如此圖思德不可不知卽或得魯蘊到關叩懇亦當遵照前諭令其親自進京於大皇帝前誠切懇請或可邀恩通市否則難以轉奏且看其誠僞何如再行定奪圖思德如或接見賊目惟當義正辭嚴明白開導勿稍示伊等以將就完事之心方爲妥協將此由六百里諭令知之○丁巳諭軍機大臣等盛京吉林爲本朝龍興之地若聽流民雜處殊於滿洲風俗攸關但承平日久盛京地方與山東直隸接壤流民漸集若一旦驅逐必致各失生計是以設立州縣管理至吉林原不與漢地相連不便令流民居住今聞流寓漸多著傳諭傅森查明辦理並永行禁止

流民毋許入境○改甘肅特納爾州判爲阜康縣仍隸迪化州奇
臺通判爲奇臺縣仍隸鎮西府○戊午諭四川邊外各土司所戴
帽頂自應照阿桂等所奏各按品級戴用但此次征剿兩金川該
土司等或多派土兵協同攻剿或派出烏拉饋運軍糧已屬奮勉
出力見在共抒瞻就趨赴闕廷其誠惻尤屬可嘉所有伊等官階
仍照原品級外著加恩均賞戴二品紅頂並令子孫承襲後一體
戴用至隨來之土舍頭人向有於本職上越級帶用帽頂者亦著
加恩仍舊賞戴以示優獎○是歲朝鮮來貢○會計天下民穀數
各省通共大小男婦二萬六千八百二十三萬八千一百八十一
名口各省通共存倉米穀四千三十萬二千五百九十二石九斗
四升八合五勺零

東華續錄

乾隆八十五

臣王先謙敬編

臣周瀚蕃恭校

乾隆四十二年丁酉春正月己巳免甘肅二十三年至三十五年民欠銀八十四萬有奇○丁丑賜阿布賚敕諭曰爾使鄂托爾齊等朝覲京師呈爾所奏托忒字表文內稱爾願將數世徵貢之塔什罕三萬戶人丁獻納等語所奏非是前者爾使鄂托爾齊至伊犁將此事呈請將軍將軍知爾心存僥倖剖晰情理行文飭駁奏到時朕謂其所辦甚當今爾使鄂托爾齊來京復以此爲請則是爾僥倖之念尙未止息朕統一區宇爾哈薩克布魯特霍罕安集延回眾皆朕臣僕朕一視同仁毫無偏向從前爾因爭塔什罕土地向霍罕額爾德尼構兵因遣都勒特克噶前來請援經伊犁將

軍飭駁朕曾降旨宣示爾今復以塔什罕爲爾數世徵貢之屬裔
欲納於朕是爾從前無力爭奪欲假天朝威力以取之耳爾哈薩
克與塔什罕皆係朕之臣僕豈肯爲爾攻彼乎况爾欲謀塔什罕
卽允所請儻他部中如有欲謀取爾哈薩克者朕亦將允其請乎
汝惟知多方謀取塔什罕以供僥倖而並未實計其利害殊屬非
是阿布賚汝奉朕此諭惟宜善自保守避收結好鄰邦以期永荷
朕恩斷不可妄生覬覦構禍鄰國也再爾使鄂托爾齊所呈表文
內稱哈薩克阿渾曾言經內有云白帽之人屏逐默克哈薩克布
魯特等深懼斯言情願永爲臣妾惟祈不爲屏逐等語斯言甚怪
異不知從何而起諒必因我兵新滅金川前此將軍伊勒圖曾遣
回爾使恐我兵乘勝並將哈薩克辦理是以假借經文託詞嘗試
則是爾未知朕撫綏之意而妄自疑懼矣夫天朝之於外藩恭順

則撫恤之鳴張則罰滅之邇來大小金川負朕厚恩恣意侵鄰遂加天罰乃不知傲懼復敢抗拒王師始命將出師殄滅小醜耳今爾哈薩克歸順已久朕方加惠撫恤豈肯無故卽加屏逐且屏逐爾等空其土地將復畀之何人朕已諭將軍傳諭爾等然非朕親諭不足以釋汝之疑朕故特降諭旨發往阿布賚惟期永荷朕恩恭順是效毋得妄行億逆以自速禍也特諭○辛巳以皇太后聖躬不豫詣長春仙館問安奉皇太后幸同樂園侍晚膳自是日始每日詣長春仙館問安○甲申以緬甸得魯蘊陳請納款命長青仍駐雲南○乙酉諭緬甸自撤兵以來已經八載每歲沿邊派人駐守究屬不成事體而其地水土惡劣朕意又不欲用兵惟嚴令各關隘絕其貿易稍足使知畏懼耳但向來雖有禁遏之名仍恐具文塞責徒爾因循歲月總未能完此事之局原擬令阿桂

爲雲貴總督前往經理邊務其事庶可早竣茲據圖思德奏聞緬
酋惜駿已死其子贅角牙襲職前據該處頭目得魯蘊具稟鎮將
等稱情願送還內地之人輸誠納貢懇請開關隨遣諭來人先回
俟其到關再定今據張鳳街辦事之騰越州知州吳楷稟稱派送
孟矣等出口之獮夷南多木比等回關據稱孟矣等至老官屯向
該頭目蓋拉機稱揚大皇帝威德嚴重及地方廣大富庶光景該
頭目甚爲感畏孟矣等卽日登舟赴阿瓦聞得魯蘊見在阿瓦料
理貢物並將蘇爾相多朝相接往阿瓦要同楊重英俱從天馬關
送還內地並欲親自到關叩懇納貢等語緬匪果知悔罪投誠還
人納貢自可就此完事但受降通市及善後章程必須曉事之重
臣相度妥辦方能合機宜而符體制著阿桂卽速馳驛前往雲南
辦理受降諸事完竣卽行回京至開關以後沿邊一切事宜均關

緊要非圖思德所能經理所有雲貴總督員缺著李侍堯調補兩
廣總督員缺著楊景素補授山東巡撫員缺著郝碩補授圖思德
著回貴州巡撫之任裴宗錫著回雲南巡撫之任郝碩見在四川
辦理軍需奏銷之事尙未能卽赴新任所有山東巡撫印務著國
泰暫行護理○丙戌以孫含中爲浙江布政使由陝西按察使遷○丁亥
濬山東汶上縣宋家窪河道○以王時薰爲陝西按察使由糧道遷○
已丑刑部議奏定擬秦廷基一案已革布政使蘇爾德等罪名諭
此案秦廷基袒護屬員稟懇總督求免問擬斬罪實所應得然覈
其情節尙較康坦獄換犯教供營私作弊者稍覺有閒使照例解
京辦理朝審時尙不至予勾或數年後發往新疆效力並不至久
繫囹圄乃不將伊卽行收禁致令在寓自戕黃邦甯復敢移屍獄
中捏報病故實出情理之外若非吳虎炳據實參奏則上下相蒙

伊於何底然吳虎炳亦因李侍堯近在東省恐其覺察自干罪戾
不得不和盤托出耳總由粵西官官相護惡習銅蔽已久爲天理
所不容故爾盡行敗露實皆若輩之自罹法網其黃邦甯一犯尤
屬罪無可追業於旬到時明正典刑至原署臬司之周升桓藩司
蘇爾德臬司廣德均有應得之罪因拏解來京並提熊學鵬到京
交刑部一併質訊今據刑部審明定擬具奏朕披閱供情詳加覈
定當秦廷基結案時周升桓正署臬司豈不知該犯問擬重罪理
應卽行收監乃託辭熊學鵬未將奏稟行知又未飭令收禁此等
謊詞豈能卸罪刑部擬以發往軍臺效力自屬允當卽著照所擬
行至熊學鵬審擬秦廷基恐擬以輕罪不能逃朕洞鑒故不敢不
將該犯擬斬而秦廷基在省未經收禁並非不知故作朦朧不爲
查察是其定讞雖似執法而於該犯仍不免徇情熊學鵬亦無可

置辨但已經革職查產足蔽厥辜熊學鵬著仍往四川辦理軍需
奏銷以觀後效至蘇爾德廣德俱係滿洲世僕尤當實心辦公且
蘇爾德曾任巡撫後因獲罪罷斥復經棄瑕錄用用爲藩司自應
屏絕情面以圖報效當黃邦甯因奏廷基在寓自縊赴署面商伊
護理巡撫卸事未久若能持正阻止黃邦甯必不敢徑行作弊其
移屍之意倡自何人黃邦甯已死無可對質但蘇爾德明知黃邦
甯欲行掩飾彌縫聽從弊混與誘人犯法何異卽立置重辟尙復
何辭廣德身任臬司奏廷基定罪時廣德旣以爲定擬過重向熊
學鵬爭執不從臬司原有奏事之責何妨就已見陳奏候朕裁奪
乃在外惟以辨論沽名而在朕前又不敢據實入告已屬不堪及
兩次傳旨詢問復敢巧詞隱飾意涉欺罔照例斬決亦無可貸但
朕臨御至今從不肯輒興大獄從前如錢度貪婪敗檢之案尙不

欲稍有株連況此案康坦獄黃邦甯二犯已經句決蘇爾德廣德
無庸卽予駢誅均著從寬改爲應斬監候秋後處決餘依議朕辦
理刑獄從不豫設成心輕重悉視其人之自取至外省吏治袒護
徇私皆所不免今就已破之案懲一儆百各省督撫司道俱當倍
加儆惕勿負朕諄切告誡之意將此通諭知之○庚寅子刻 皇
太后疾大漸 上至長春仙館問侍丑刻 皇太后崩 上哀號
擗踊命備黃輿恭奉 大行皇太后還宮 上親扶安奉 慈甯
宮正殿 大行皇太后大殮 上痛哭失聲行奠獻禮脩食如視
膳時命以含清齋爲倚廬席地寢苦諸王大臣懇請還宮不允○
是日丑刻奉 大行皇太后遺誥曰予以薄德祇膺 昊蒼眷佑
列聖篤祥誕育帝躬丕紹 鴻緒今皇帝秉性仁孝承歡養志
克敬克誠視膳問安晨夕靡閒每當巡幸所至必掖輦同行親見

億兆呼嵩尊親並篤合萬國歡以天下養信可謂之兼備矣且木
蘭秋猶前期必奉予幸避暑山莊以協夏清之禮新正御園慶節
必奉予駐長春仙館以愜宴賞之情至凡遇萬壽大慶必躬自起
舞以申愛敬每當宮庭侍宴必親製詩畫以博欣愉予因益怡樂
康強頤和晚景又見皇帝神武懋昭廟謨廣運平定準夷回部廣
拓幅員而近年征勦兩金川宵旰焦勞運籌五載大功幸得告成
皇帝之心始寬予懷亦因以大慰方謂際此海宇乂甯豐登迭奏
予更得長延景福葆養天和惟念年齒日高未免桑榆景迫深惕
於衷猶幸體氣素強精神未耗期頤或可漸臻皇帝每見予康健
如常喜形於色詎意昨者偶遭寒疾寢至沈疴皇帝侍藥問安憂
心時切日叩 天神保助祈予速就痊可予亦思調理向愈以安
皇帝之心不期延至二十三日丑時大數垂盡遂至彌留予壽已

八十有六母儀尊養四十二年因集勛歸美而三晉徽稱遇萬壽
祝釐而三舉慶典中外一統五世同堂稽之史冊實罕倫比今予
福壽考終夫復何憾惟念皇帝孝思旰食久侍膝下孺慕終身今
大故忽嬰慮必過於悲痛宜勉自節哀勿致稍毀惟當以國事爲
重中外文武羣臣恪恭奉職共襄邦治予鑒庶少安焉其喪制
悉遵典禮皇帝持服當依以日易月之例二十七日而除 天

地 宗廟 社稷之祭不可久疏百神羣祀亦不可輟故茲誥諭
其各遵行○諭朕蒙 聖母皇太后鞠育恩慈情深罔極臨御四
十二年承 歡奉養深荷 慈愉且見 聖母動履康強不煩扶
掖私心慶慰第壽日益高萬年豈真可祝欣喜之餘並不敢存孔
子一則以懼之想惟有誠祈 天佑益算延祺而朕躬愛日之惻
忱實無能一刻稍置今春恭奉 皇太后幸御園初九日於九州

清宴侍 膳觀鑑五世一堂同伸歡忭是日 慈顏康豫不減常
年朕方慶幸以望七之齡得侍望九 聖母實從來史冊所未有
十一日進宮齋戒十四日 祈穀禮成回御園請 安知 聖母
偶爾違和旋進藥調治體亦稍安不意疾尋反復 聖母猶不
欲令朕知 慈躬病劇恐朕憂煩然自是疾日以增急難不復朕
昨兩次詣 寢宮問 安 聖母言笑如常惟氣力稍覺疲倦
諭朕云頤養數日可卽就痊朕亦冀可克副 慈諭詎意將及夜
分痰忽上湧遂至大漸遽於二十三日丑時 仙馭升遐奄棄朕
躬一何迅速昨日未時請 安以後竟無由再仰 慈顏呼天搶
地痛何能極朕嘗命皇六子推測算法云乾隆五十一年六十年
皆正旦日食朕私計以五十一年丙午 皇太后春秋已九十有
五朕年亦七十有六是歲或遇 聖母大事雖未滿百歲而已屆

期頤且係人生必有之事庶稍無憾其六十年乙卯則係朕當歸政之年均可以應懸象孰意距丙午尙十年 皇太后忽爾賓天竟不能遂朕之願則朕將來歸政亦恐難如奢望此究係朕心不誠未能仰邀天鑒今呼號無及哀痛之外更復何言至於孝服日期 皇太后遺誥令朕止穿孝二十七日然追憶雍正十三年遣 皇考大故朕欲持服三年因奉 聖母慈諭止命穿孝百日朕卽遵從今值 皇太后之事朕仍當依 前諭穿孝百日其餘王公大臣官員等並照例二十七日而除所有 大喪禮儀著派皇四子永璘皇六子永瑤莊親王永璘協辦大學士尙書英廉尙書永貴署尙書邁拉遜侍郎金簡管理其一切應行事宜並著詳稽舊典悉心覈議隨時具奏至於 聖母慈愛朕躬每 諭朕勿過憂勞惟當以國事爲重今朕遭此大故雖不能節哀亦不敢過毀

至國事所繫惟當益勉孜孜朝乾夕惕以副天下臣民之望以慰
聖母在天之靈將此通諭中外知之○辛卯諭尊 大行皇太
后諡號爲 孝聖憲皇后○諭前因 聖母萬壽特宏錫類之仁
普蠲各省錢糧以昭慶惠朕本欲俟恭祝 聖母九旬萬壽之年
再溥 恩施一次茲者 仙馭升遐此後更無可推廣 慈仁之
處見在部庫帑項又積至七千餘萬著加恩自戊戌年爲始普蠲
天下錢糧仍分三年輪免俾寰宇億兆人民仍得共被 慈恩永
申哀慕而朕終天罔極之忱雖不能仰酬萬一庶藉茲稍展其如
何輪派年分著戶部卽速悉心覈奏遵行○諭軍機大臣等向來
各督撫鹽政關差織造等於年節慶典每備物呈進雖屢經飭禁
而諸臣仍有再三懇請以盡悃忱者朕亦難以固拒因閱收一二
以備賞賚之用今奄遭 皇太后大事五中摧絕哀痛難窮永無

奉侍承 歡之日卽遇佳時令節方觸景傷情彌增悲痛豈復能
行慶宴賞著傳諭各督撫鹽政等今年槩不許呈進貢品如或不
遵以違制論其各仰體朕意恪奉毋違○諭昨據禮部奏 大行
皇太后喪儀二十七日之內所有 社稷壇等祭祀援照雍正九
年 孝敬憲皇后喪儀素服致祭樂設而不作等因朕以 郊
廟大祀典禮綦重似不應因大喪而稍略其禮因命軍機大臣查
明具奏茲據奏稱會典所載康熙年間 列后之事遇大祀典祭
日卽穿朝服作樂禮部此奏未將遠年舊例細查僅引雍正九年
乾隆十三年近年之例所辦原未周到今公同酌議二十七日之
內如遇 郊 廟大祀仍作樂穿朝服行禮其餘尋常祭祀均用
素服致祭樂設而不作等語所奏甚是 孝敬憲皇后聖母大事
係九月二十九日翌日卽遇孟冬時享 太廟彼時禮官或因爲

期太近不及詳查會典從權率辦本不可據以爲例至孝賢皇后喪事係三月十一日至中秋祭祀已在百日以外尤不當引雍正年間二十七日以內之例其時禮部所辦本屬未協朕亦忽略看過未爲覈定今既知其誤自應更正著照軍機大臣所議二十七日內如遇郊廟社稷壇及日月壇諸大祀雖係遣官致祭仍當作樂穿朝服行禮其餘尋常祭祀均用素服致祭樂設而不作方爲允當著交禮部卽照此辦理其從前誤辦之案不必存彙卽以此著爲令典○諭雍正十三年皇考龍馭上賓朕欲持服三年羣臣請循以日易月之制朕皆未允嗣奉聖母慈諭令朕持服百日因卽遵行然百日釋服後仍素服滿二十七月今遭聖母大故自應仍遵懿旨持服百日昨已明降諭旨矣其素服二十七月亦照前例惟遇壇廟大祀行禮及致齋三日

閱視 祝版先期詣 壇並視朝聽政諸事朕從前惟準理而行並未載在令典此時當詳議及之又如王公大臣官員持服二十七日而除素服則滿百日至百日後用何服色及陪祀齋戒常朝坐班並一切典禮應如何定制亦當酌定章程頃檢閱雍正十三年王大臣等所定條款頗爲該括著將原摺交軍機大臣會同辦理喪儀王大臣等悉心詳議具奏○乙未尊 大行皇太后陵曰泰東陵○丙申恭移 大行皇太后梓宮於暢春園安奉 九經三事殿 上居圓明園

二月丁酉朔 上詣 安佑宮行告哀禮○戊戌 上居無逸齋苦次○諭朕從前原欲於皇孫內遣派一人恭赴 泰陵承祀因仰體 皇太后高年以孫曾繞膝爲樂 聖意不欲其遠離是以未經辦及今遭 大行皇太后大事見在敬辦 泰東陵工程卽

日 山陵禮成著封繇德爲鎮國公前往 泰陵 泰東陵侍奉
貝子弘曉著卽回京所有弘曉住宅原係官爲建造應卽給與繇
德居住繇德係朕長孫茲令其祇奉 皇考 皇妣陵寢於理爲
宜至伊昨歲曾獲罪愆因將伊王爵令繇恩承襲今伊公爵仍係
推 聖母慈愛之心伊務宜倍加敬慎承受恩澤毋負朕教育成
全至意○己亥 上還居圓明園○庚子 上詣 九經三事殿

大行皇太后梓宮前供奠諸王大臣懇請間一二日行禮不允
○壬寅諭軍機大臣等上年金川大功告成所有該處地界經將
軍等繪圖奏明歸入版圖安屯耕種原應如是辦理茲朕檢閱平
定金川方略內如從前綽斯甲布布拉克底巴旺黨壩等各土司
卽有被金川侵占地方此時以我大軍之力全境埽平前金川所
吞鄰境尺寸莫非我土但念該土司等數年以來跟隨打仗守卡

出於誠惻其勤勞亦屬可憫所應特沛殊恩示以獎勵見已面諭
明亮齋奉此旨俟到川時會同總督文綬提督桂林將綽斯甲布
布拉克底巴旺黨壩土司等被金川侵占地方逐加詳勘查明無
礙田土可以取給者繪圖具奏候朕降旨酌量賞給以示優恤遠
番逾格加恩之至意將此傳諭文綬桂林知之○癸卯 上詣九
經三事殿 大行皇太后梓宮前行初祭禮○甲辰諭二十七月
內停止元旦朝賀其百日後尋常御殿視朝屆期請旨○辛亥諭
昨江蘇巡撫楊魁題請將桃源縣民孫謀掌毆伊父孫尙文咬落
指節擬以斬決一疏已批法司覈奏矣查閱本內孫尙文供伊子
孫謀平昔不孝屢次違犯會於三十七年九月稟縣柳責等語彼
時辦理實屬非是該犯孫謀忤逆既經伊父稟縣卽應嚴行懲治
或發煙瘴或發他省使伊父得安居守業豈可僅以枷責從輕發

落此等不孝之徒所謂下愚不移何得留於其家復致日後釀成
事端向來刑部辦理呈告忤逆之案皆按律科罪卽從輕亦擬發
遣前此孫尙文控告伊子時地方官若照此辦理何至尙留敗類
任其回家肆行狂悖幸而孫尙文被咬未死設使因傷致斃或竟
有逆倫之事則是因一時姑息之心留此梟獍使得肆毒於其父
母於倫紀風教大有關係所有從前辦理此案之府縣實屬疏縱
至臬司刑名總匯巡撫察吏安民何俱漫不經心若此著查明一
併交部議處嗣後各省似此首告忤逆之案俱應照例坐以發遣
著刑部定議具奏尋奏嗣後忤逆之案其父母呈控到官懇求發
遣如屢次違犯逆蹟顯然者卽將伊子發煙瘴地方充軍若係旗
人發往黑龍江從之○甲寅吏部議准陝甘總督勒爾謹奏莊浪
地方與隆德靜甯連界靜甯幅員遼闊未便再行歸併若全歸隆

德則距縣較遠村落凡遇完糧訴訟等事往返維艱應將分駐甯
羌驛之河州州判裁汰改設莊浪縣丞其州判所管之事仍歸河
州管理從之○乙卯 上詣 九經三事殿 大行皇太后梓宮
前行大祭禮○丙辰革職留任倉場侍郎嘉謨以徇庇千總賴傳
揚罪革任○丁巳 上詣 九經三事殿 大行皇太后梓宮前
行月祭禮○諭廣西按察使彭理來京陛見年力已衰難勝臬司
之任著留京以對品京堂補用彭理如此衰邁不但不勝臬司之
任卽岳常澧道亦難稱職敦福何以姑息不行奏聞昨裴宗錫因
道員徐堂年老卽據實奏請休致督撫察吏之道自應如此前敦
福因奏請陛見向陳輝祖札商巡撫印務應交何員護理已屬不
知事體今又不將彭理年老之處據實具奏難勝巡撫之任敦福
著調補倉場侍郎仍著交部嚴加議處其湖南巡撫員缺著顏希

深補授○理藩院奏已爲喇嘛之台吉塔布囊應否襲職得旨旣
爲喇嘛卽係出家之人一切皆當棄而不顧若仍令襲職於理未
協嗣後已爲喇嘛之台吉塔布囊內若於未曾出家以前所生之
子將伊職銜令其子承襲如無親子弟兄胞姪俱不准承襲著爲
令○戊午調圖桑阿爲湖北布政使白瀛爲江西布政使○調永
慶爲貴州按察使國棟爲浙江按察使○以榮柱爲河南布政使
趙銓爲河南按察使

由湖北驛
道遷

○以哈靖阿爲廣西按察使

由直
隸大

名道
遷

○庚申諭軍機大臣等據高晉奏會同薩載開放引河業於

二月十八日將開放暢順引河功成情形專差會摺奏報等語陶
莊開放引河此時辦理關鍵朕心時切懸念高晉等旣經開放暢
順自應由驛馳奏以慰廑懷乃僅差人齎摺此時尙未到京何以
不權事體輕重若此至引河旣經開放則舊口自應嚴緊堵禦或

將木龍相度移置或竟度地堅築埽工俾引河永遠暢流以資羣
固高晉等接奉此旨務須盡心籌畫相度機宜妥協商辦一面派
熟練之員詳加指示令其在工料理薩載卽進京陛見高晉前赴
安徽查辦琨玉之案完竣後地方事務緊要仍遵前旨不必來可
將此由四百里傳諭高晉並薩載知之仍將會同籌辦情形詳悉
覆奏○辛酉命外任旗員親老願回京者酌用京職○壬戌諭朕
從前屢次南巡閱視清黃交會處悉其倒漾之患因思若能引向
陶莊以北而流則清口通暢庶免黃流倒灌因未躬臨陶莊一帶
閱視是以踟躕及詢之歷任河臣亦未有能任此事者昨歲薩載
赴山東行在召見時諭令赴黃河海口上下察看伊卽奏請若於
陶莊開挖引河一道使黃水繞北下注相距清口較遠清水益得
暢行與朕意適相符因與再三籌酌伊果能遵照指示剔挑完

竣今據奏報於二月十五日將引河開放過水新河內大溜暢注
衝刷寬深形勢甚順各等語黃河大溜既由陶莊北行離清口甚
遠可免黃水倒灌之虞並收清水刷沙之益卽就近險工亦俱化
爲平穩薩載辦理此事實心實力其所辦引河實爲全河一大關
銑非尋常築隄打埽開河者可比薩載著交部查照齊蘇勒之例
從優議敘以示獎勵其在工出力各員交高晉薩載查明交部議
敘尋吏部奏薩載請照齊蘇勒之例賞給騎都尉世職從之○諭
軍機大臣等據高晉等奏報陶莊引河開放功成大溜暢注情形
一摺覽奏深爲欣慰已於摺內批示並明降諭旨將薩載交部議
敘矣陶莊開挑引河爲治黃一大關鍵今開放之後新河內大溜
暢注衝刷寬深形勢甚順從此清黃分流直至周家莊匯歸東注
清口可免倒灌之虞實爲一勞永逸非河神默佑不能成此鉅

功自應於該處立廟以酬神貺又另摺內所稱通湖引河勘辦情形此皆其餘事惟當謹防舊河口最爲關繫緊要又老黃壩工程尤關緊要更宜悉心詳慎防護以期永遠鞏固至摺內稱原估挑水壩工計長七十七丈其餘河面僅有二十七丈與其留此河泓旁洩不若一律估築使水無分注則全河溜勢自必盡歸新河雖所用工料加增銀八千餘兩於要工更爲有裨等語所奏甚合機宜自應如此辦理其舊河內未築壩工據稱旬日內可趨堵告竣見在曾否已經堵築畢工並著上緊妥辦至見在河身挑寬若干及河流暢注之處自應繪畫全圖貼說註明以便省覽何以伊等見未及此著傳諭高晉薩載速即詳晰繪圖貼說並將工所立廟及老黃壩工程如何防護之處迅速據實覆奏將此由四百里諭令知之○停止民壯演習火槍○甲子 上臨西花園視 皇

四子履郡王永城疾○皇四子履郡王永城薨○諭皇四子履郡王永城秉性醇良持躬端謹朕諸子中齒序最長昨因避疾竟至不起著派入阿哥永璇穿孝與金簡辦理喪儀所有一切典禮加恩照親王儀注行尋予諡曰端

三月庚午命裁虹縣歸泗州以其城爲泗州治○辛未左都御史素爾訥以年老休致○壬申以農起爲安徽布政使調秦雄飛爲安徽按察使以福州爲湖北按察使

由廣東筆羅道遷

○甲戌刑部議駁

直隸總督議奏沈萬良毆殺王廷修一案諭此案沈萬良之父沈三行竊拒捕原係有罪之人被事主王廷修知覺趕毆致斃將王廷修照黑夜偷竊被事主毆打致死例擬徒本案已經完結法非應抵義不當仇乃伊子沈萬良忽於十餘年後復將已伏罪之王廷修乘機殺害該督援照子孫報仇例擬以杖流經部議駁甚是

從前各省辦理復仇之案如廣東會士標毆死會會昌律擬斬候而會會昌之子會朝宗復毆死會士標之子會亞二律擬斬決朕特明降諭旨改爲絞決又河南省智洪義因父智順被趙二毆死趙二問擬絞候智洪義藉言報復輒殺其子趙倉律擬斬候九卿閣臣於句到招冊內夾籤聲明又經朕明降諭旨通諭問刑衙門以我朝明罰敕法審慎周詳生殺悉由讞司豈容一介不逞之徒私行報復况國法旣彰則私恨已洩仇殺之端斷不可啓訓示最爲明晰卽子孫復仇之例若因伊父死於非命而兇手竟得漏網冤無可伸其復仇猶爲有說今沈三原係罪人王廷修又已伏罪結案則國法已伸王廷修卽屬無罪之人乃沈萬良復逞兇故殺卽應照故殺例問擬若如該督所擬杖流將來此風一開誰非人子皆得挾其私忿藉口復仇逞兇撓法何所底止豈辟以止辟之

義耶周元理引律不當著飭行此案著照部議交周元理另行照

律改擬具題並將此通諭內外問刑衙門知之○戊寅以邁拉遜

爲左都御史

由吏部侍郎遷

○壬午恭上

大行皇太后尊諡曰 孝聖

慈宣康惠敦和敬天光聖憲皇后○甲申貝子允祜以未參滿斗

罪降鎮國公○乙酉

上詣

九經三事殿

孝聖憲皇后梓宮

前再行月祭禮○

丙戌裁烏嚕木齊領隊大臣二員○戊子轉瑚

世泰爲吏部左侍郎調慶桂爲吏部右侍郎○以索琳爲理藩院

侍郎○壬辰諭軍機大臣等今日據阿桂李侍堯等奏先後行抵

雲南省城面商籌辦緬匪事宜內稱圖思德所奏得魯蘊遣孟幹

等到關藉詞象隻未到並請差官赴馬脖子與節蓋說話經提臣

將孟幹暫留飭令跟役先後前往曉諭節蓋不敢進關迄今尙未

據圖思德等知會信息計此時瘴癘盛發目下已無可辦前說似

覺荒唐臣等卽起程前赴永昌察看情形面商另奏等語所奏是已於摺內批示矣蓋開關通商一事自圖思德以至滇省文武官民人等無不願爲想因得有得魯蘊遣人來稟遂皆慫恿稟報圖思德輒據以入奏經朕洞燭情僞明晰諭知今果不出朕所料至進貢還人之事係得魯蘊先遣人稟知何以中途反覆藉詞象隻未到又添出與蓋拉機商量情節並請差官赴馬脖子與節蓋說話等情種種支離謬妄可惡已極此事係得魯蘊先發其端並非自我而起今節蓋旣不敢進關朕意以爲應或用計或用力使幹弁帶兵一二百至馬脖子將節蓋拏進關內詢以得魯蘊何故如此說謊其意竟欲何爲訊得實情卽應將節蓋留住另遣伊手下明白人回緬曉諭得魯蘊等以此事從前緬匪敢於將蘇爾相等拏留則此時拏獲節蓋留住實所應當况此次貢象還人之說由

爾等先行具稟今忽又反覆豈有不孥人究問明白之理如此傳
諭詰問得魯蘊等諒伊亦無可置辨卽因此復生事端伊如果敢
於侵犯邊境則正可乘此機宜以逸待勞大加懲創滇省兵力亦
儘可辦理蓋進兵往緬則尙限於地勢氣候恐徒傷病我人故不
肯用兵若彼離巢遠來至我邊境則勦殺實不爲難朕意定以如
此辦理著傳諭阿桂李侍堯悉心籌酌一面辦理一面奏聞自古
中國之駕馭外夷自應示之以威令其懾服則可保邊境甯謐若
稍存將就姑息之見則是示之以弱未有不因此受害者此理甚
明恐啓邊釁乃漢唐宋明無能爲之言非我大清全盛時之言也
阿桂李侍堯等皆通達事務之人自應見及於此圖思德長青各
有本任事務緬匪見在旣無可辦之處留駐於彼亦屬無益自應
各令回任將此由六百里加緊發往仍卽速回奏諭令阿桂李侍

堯等知之

夏四月戊戌諭四月初六日舉行 常雩典禮例遣親王恭代敬

念 天壇 地壇 祈穀壇大祀禮尤尊重更非 太廟可比所

有上 壇承祭執事之人自宜蠲潔將事以肅精禋况看守 郊

壇人員遇有大事並不摘冠纓而祭時朝服樂章又一切如常未

便仍留長髮從事見在派出承祭之親王及 壇上執事官員俱

著先行薙髮再進 壇行禮用申誠敬其陪祀各員在 壇墀以

外者毋庸議將此永著爲令○召阿桂來京○壬寅諭軍機大臣

等朕閱四庫全書館所進鈔本朱彝尊經義考於歷代說經諸事

廣搜博考存佚可徵實有裨於經學朕因親製詩篇題識卷首此

書見已刊行於世聞書板尙在浙江著將御製詩錄寄三寶就便

詢問藏板之家如願將朕此詩添冠卷端聽其刊刻亦使士林咸

知朕闡崇經學之意○軍機大臣等議奏遺奠字據考會典所載並不詳遺字之義徧檢儀禮經注亦無遺奠明文惟孔穎達士喪禮疏內始爲此說唐代沿用見於通典考儀禮葬日將行祭畢苞牲體之車名爲遣車其義與祭禮不相涉穎達牽合成文於禮旣不甚合稱謂尤屬未安又考儀禮敘將行之祭云徹巾苞牲鄭康成注苞者象旣饗而歸賓俎者也又禮記雜記曾子曰夫大饗旣饗卷三牲之俎歸於賓館所以爲哀也鄭注歸饗歸賓館所以厚之也言孝子哀親之去也據此是將行之祭原用饗禮以明哀親之去也應將會典內遺奠二字改用饗奠清語不必更改得旨是依議○乙巳諭向例鄉會試同考官分經閱卷易書詩三經卷分三四五房春秋禮記卷止分二房以二人專閱一經則暗藏關節易於識認立法不能無弊况各經卷多者二房閱至數百卷甚且

多至千卷其卷少者一房止閱一二百卷校閱多寡亦太覺懸殊
辦理未爲盡善各省主考旣以一人兼閱五經卷則房考官同係
科甲出身諒無不能閱看他經之理自乾隆丁酉科爲始鄉會試
同考試官俱不必拘泥五經分房如房考官十人場卷五千本則
每房各閱五百本均勻分之其每經分中卷數仍照原額如此各
房通看卽欲呈送關節勢不能徧送多人於防範更爲周密而各
房考均勻派閱亦不至多寡相懸致滋草率之弊將此通行傳諭
並刊入科場條例一體遵行○丙午 上詣 九經三事殿 孝
聖憲皇后梓宮前三行月祭禮○戊申 上詣 九經三事殿
孝聖憲皇后梓宮前行祖奠禮是日 上居無逸齋苦次○追予
原任太子太傅廣西巡撫傅宏烈春秋致祭○己酉 孝聖憲皇
后梓宮發引 上躬送往 泰東陵啓鑾○免經過地方本年額

賊十分之五易州免十分之七○癸丑 上謁 泰陵詣 泰東陵閱視工程 孝聖憲皇后梓宮至 泰東陵奉安於 隆恩殿○以經理工程整速晉封誠郡王弘暢爲親王議敘在工諸臣有差○丙辰 上詣 泰東陵 隆恩殿 孝聖憲皇后梓宮前行百日祭禮○諭軍機大臣等阿桂等奏籌辦邊務緣由一摺已於摺內批示矣據稱賊匪正在遲回觀望若遷就招徠固萬不可而相機設法隨宜辦理乃臣等必應竭盡之心總以無妨國體不長賊智爲主等語所奏自屬正理阿桂亦止可如此籌畫前已傳諭阿桂如賊匪竟無信息阿桂自不值久駐邊境等候或已發兵往擒節蓋俟其就擒再定行止否則將應辦邊隘事宜面與李侍堯講論交其妥辦阿桂此時如尙有機會可乘自宜悉心籌度若賊匪仍似前此之荒唐狡諂竟不必視以爲事儻賊復差人來投文

稟卽將來人拘禁或擇其中之無用者一人驅逐歸巢其稟總付之不答並嚴飭邊隘不許內地民人攜貨偷出此外亦更無別法至令阿桂赴滇受降雖已明發諭旨今賊匪反覆變更前說盡屬誑語其曲在賊匪不足重輕阿桂卽遵旨回京原屬無礙將此由六百里傳諭阿桂等知之○丁巳諭大學士舒赫德老成端重練達有爲朕御極之初卽膺任使宣猷中外四十餘年前此平定回城懋著勞績嗣於西陲撫輯歸順遠藩東省勦捕悖逆匪眾悉心籌畫勤合機宜實爲國家得力大臣自簡任綸扉日直內廷兼總部務勤勞匪懈倚毗良深茲以 聖母孝聖憲皇后 山陵大禮屆從前來至期應恭點 神主襄事乃於十九日忽遭時疾卽派太醫院堂官診視頻加存問以冀速痊茲遽聞溘逝深爲震悼隨卽賞給陀羅經被遣額駙福隆安帶領侍衛十員往奠茶酒俟進

京仍親臨賜奠並著加恩晉贈太保入祀賢良祠其任內革職降級之案槩予開復伊子舒常已諭令卽馳驛來京治喪所有應得卹典仍著該部察例具奏尋予祭葬諡文襄○戊午諭本月二十五日 聖母孝聖憲皇后 山陵禮成恭點 神主例應滿漢大學士各一員敬謹將事今舒赫德病故著永貴暫署滿大學士敬襄點 主大典至見在吏部滿尙書無人並著永貴署理○諭軍機大臣等李侍堯籌辦緬甸邊務情形一摺所慮亦是已於摺內批示據稱緬匪屢以詭詞欺誑藉此窺我動靜其反覆已非一次甚爲可惡查從前定議閉關禁市絕其資生之路原屬制緬要策見在該酋來稟亦頗懇惻開關使生計果眞窘迫自當力圖完局因何屢有變更茲悉心體訪緬地物產棉花頗多次則碧霞玳瑁翠玉近年以來彼處玉石等物雲南廣東二省售賣頗多皆由內地

每差土人獵夷出關偵探兵役因見官差要務於隨身行李搜檢未完夾帶勢所不免究之所偵探者止在野人地界撿拾無稽但不能得彼真情轉將內地信息從而洩漏至棉花一項臣在粵省時見近年外洋腳船進口全載棉花頗爲行商之累因與監督德魁嚴飭行商嗣後儘再捆裝棉花入口不許交易定將原船押逐初不知緬地多產棉花今到滇後聞緬匪之晏共羊翁等處爲洋船收泊交易之所是緬地棉花悉從海道帶運似滇省開關禁市有名無實等語所陳悉中緬匪情弊著傳諭楊景素會同李質穎德魁於海口嚴行查禁如有裝載棉花船隻槩不許其進口務當實力奉行勿以空言塞責仍不時留心訪查如有胥役等受賄私放者立即重治其罪至滇省嚴查邊隘毋許內地民人帶貨偷越圖思德邇年所辦似亦不過具文未必實能禁絕今李侍堯旣

見及此自能設法嚴查不似從前之虛應故事惟當實力爲之要
以久而勿懈至於內地差人出關偵探從無確信轉致洩漏內地
風聲實無益而有損從此差人偵探一事竟當停止想李侍堯必
能妥辦也又據奏暹羅頭目鄭昭收合餘眾欲爲故主復仇始而
稟臣轉求恩賞封號經臣以大義奏明檄覆繼則以情願合擊緬
匪豫懇示期爲請曾以青緞所獲之瀉都燕達及男婦人等來獻
近年復將緬匪所留內地兵民節次送回並稱連歲攻擊軍火缺
乏求買硫磺頗見小心恭順節經臣奏明仍作己意准其買回並
予獎勵窺其心惟冀邀大皇帝施恩封賞俾主國事臣從前入覲
時曾蒙面諭外夷原不必深求如鄭昭再有稟乞恩汝可酌量具
奏向特疑其或與暹羅舊部別構弊端謬思倚仗天威巧圖懾服
其與緬匪仇殺亦無目覩之人難保無捏詞欺誑茲詢之通事寸

博學及送同騰越州民楊朝品等僉供鄭昭誘殺緬匪多人且海
商傳言鄭昭漢子甚好竟是緬匪勁敵而近日得魯蘊之詭詞款
關又焉知非因鄭昭之故慮及天朝加兵故爲此延緩之計可否
敕下兩廣督臣作爲己意檄詢鄭昭謂詔氏雖已無子孫而天朝
原頒敕印見在是否存失微露其意鄭昭自必乞恩求封俟具稟
時據情轉奏仰懇施恩錫封伊得有天朝符命更易號召鄰番努
力殺賊雖未必能縛渠獻馘而緬匪頻年疲於攻戰俟其困頓揚
言大兵進剿彼時畏懼腹背受敵搖尾乞憐人象到關准其納款
亦可藉完此局等語此亦治病做方姑試爲之原屬並行不悖但
檄文仍宜作李侍義之意見令軍機大臣代擬檄稟發去諭以本
閩部堂在粵省數年屢次接閱來稟知爾收合餘眾欲爲故主報
仇曾誘殺緬匪多人是爾尙知大義且節次送回緬匪所留滇省

兵民具見爾小心恭順是以爾兩次需用硫磺鐵鍋等物並准買同以示獎勵且代爲奏聞大皇帝亦深爲嘉予至爾從前稟懇欲邀天朝封號彼時以爾妄冀恩澤未爲正理且詔氏雖已無人而天朝原頒敕印見在或存或失未經聲明不便入告因而駁回原欲俟爾稍有出力之處及查明原頒敕印下落陳請有名再行代爾奏懇加恩今大皇帝因雲貴地方緊要將本閣部堂調任雲貴總督而簡任楊大人爲兩廣總督本閣部堂已將爾歷次稟懇之事詳細告知爾嗣後如有稟卽稟知新任楊大人自必照本閣部堂所籌爲爾酌辦今啓行在即特將此遇便諭令知之楊景素於接奉後卽照李侍堯任內檄諭鄭昭之例付誠實洋船發往令其寄到如鄭昭續有稟懇之事卽迅速驛奏以便籌度辦理惟是以夷攻夷雖亦籌邊之策但須中國兵力能至其地控制得宜方足

以收其效今暹羅與緬匪接壤之處遠隔重洋斷不能發兵往彼協剿若專藉鄭昭之力彼或貪得其土地人民冀圖自利不能於中國有益其暹羅爭戰之處不過緬匪邊界未必徑至阿瓦城更不足制其死命設或鄭昭果實心剿殺緬匪亦止可聽其自爲若稍露借助外番之意彼必要求無厭而此時發檄詢問尤不便輕露端倪致彼居奇觀望撫馭外夷之道大率如此李侍堯楊景素皆不可不知也再大學士舒赫德忽於二十二日病故其員缺自應阿桂補放但定例大學士缺須俟一月後始行降旨見在大學士無人阿桂接奉此旨可速將邊境應辦要務告知李侍堯酌量妥辦卽行起程回京至緬匪求降一事固由圖思德輕聽屬員慫恿希圖完事因適有得魯蘊投稟到邊遂信以爲真據詞入告其實捏飾詭詐罪在緬匪並與圖思德無涉此時惟嚴飭邊境各員

實力稽查不許內外貨物偷漏出入若彼遣人投稟卽設法將來
人拘囚其稟槩付之不答或知著急亦未可定舍此更無他法至
舒赫德之事昨日下午始出朕方爲之震悼今早遞到滇省軍報
止係李侍堯出名不知所奏何事心甚憂疑啓函時爲之手顫及
至披閱則係李侍堯條陳暹羅之事驚心始定雖李侍堯各抒所
奏不必與阿桂連銜然阿桂又何妨另奏一事與之同發致朕懲
羹吹齋多此一番疑慮耶此旨著卽由六百里加緊發往傳令阿
桂李侍堯楊景素知之其嚴禁洋船棉花進口一節並傳諭令李
質穎德魁一體遵辦○庚申 孝聖憲皇后大葬禮成○辛酉
上回鑾○壬戌諭軍機大臣等前據圖思德奏稱本年五月內得
魯蘊差孟幹孟團致送禮物並稱欲將蘇爾相等送回隨遣其出
口傳令得魯蘊親來及至二月孟幹孟團復進關稟稱象隻未到

見令節蓋四人在馬脖子等候求差官到彼說話令將孟幹孟團扣留嗣據阿桂等奏稱孟團係贅角牙妻父渺萬機之用人遞稟懇求放回見飭拘留不遣各等情因孟團係緬匪得力之人曾諭令阿桂帶其進京以備訊問今思得魯蘊忽爾捏詞欺誑嗣復反悔情節甚爲可惡其中原委孟團必知其詳阿桂等自應將其嚴加刑訊詰以緣何反覆之故令其據實供吐勿任狡飾況從前賊匪既敢將內地差往之蘇爾相擅行鎖鐐此時將孟團用刑訊鞫庶稍解恨而此等么臈匪眾令其多受痛楚又何足惜著傳諭阿桂李侍堯卽將孟團嚴加刑訊取具確切供情先行迅速馳奏仍派委妥幹員弁將孟團鎖鐐解京並飭沿途撥兵護送嚴加管束毋致稍有疏虞著由六百里加緊傳諭阿桂李侍堯知之尋奏緬匪狡詐可恨正將孟團等鎖押提訊以舒拘禁蘇爾相之恨因蘇

爾相已送出見將孟團孟幹碎凍三人羈禁勒取楊重英得旨覽
又批既送出蘇爾相則此三人亦不必加之刑訊矣扣留以待勒
取楊重英可也○甲子 上還京師

五月乙丑朔 上恭奉 孝聖憲皇后神牌升祔 太廟次日頒

詔天下覃恩有差○諭向來各衙門保送京察一等人員俱照上
次數目比較甯闕毋濫引見時吏部開單進呈候朕閱定於甄簡
才能之中仍寓慎重激揚之意惟是每次與上居相較固以防其
濫額然或過泥成例此次比上居少一人下居又比此次少一人
遞行減少勢將無所底止亦非所以示鼓勵嗣後吏部引見進呈
比較清單著將上兩次數目一併開列若此次比上居多一人而
較之再上一次數仍相倣即可毋庸裁減將來吏部較覈亦以此
爲準如此酌中定制既無愆濫膺保薦亦不至屈抑人才著爲令

○丙寅命二十七月內 郊 壇大祀俱御禮輿○諭大學士舒
赫德應得封典俱加恩仍行給予○戊辰 上臨大學士舒赫德
喪次賜奠○壬申免直隸清苑等十州縣逋賦○丁丑諭前因明
史內於蒙古人地名音譯未真特命館臣照遼金元三史例查覈
改訂並就原板扣算字數刊正其間增損成文不過數字而止於
原書體制無多更易茲閱所進籤之英宗本紀如正統十四年巡
按福建御史汪澄棄市並殺前巡按御史柴文顯同時殺兩御史
而未詳其獲罪之由不足以資論定又土木之敗由於王振挾主
親征違眾輕出及敵鋒既迫猶以顧戀輜重不卽退軍致英宗爲
額森所乘陷身漠北乃紀中於王振事不及一語尤爲疏略雖本
紀爲全史綱領體尙謹嚴而於帝王刑政征伐之大端關係國家
隆替者豈可拘泥書法闕而不備致讀者無以考鏡其得失蓋緣

當時紀事每多諱飾又往往徇不公而明史修自本朝屢淹歲
月直至朕御極以後始克勒成一書其時秉筆諸臣因時代既遠
傳聞異辭惟恐涉冗濫之嫌遂爾意存簡括於事蹟要領不能臚
紀精細於史法尙未允協前因明紀綱目所載本末未爲賅備降
旨另行改輯所有明史本紀並著英廉程景伊梁國治和珅劉墉
等將原本逐一考覈添修務令首尾詳明辭義精當仍以次繕進
候朕親閱鑒定重刊頒行用昭傳信○戊寅以普蠲天下錢糧免
福建臺灣府屬官莊租息銀兩十分之三○甲申諭滿斗被徐成
傑訐控一案其受贓各款俱經審虛卽芟樹割草二款亦屬輕罪
惟於五花嶺峰口拆牆通路乘馬往來業經軍機大臣會同刑部
審訊得實按律擬斬本屬正條卽奏請正法亦滿斗所自取第念
該處原係舊有小路雖用石牆砌斷兵民人等仍由坡上繞走滿

斗之拆石通路亦不過意圖近便非有心干礙風水者可比所謂
法重情輕尙不至罪無可追昨因三通館進續通志朕偶披閱新
唐書見狄仁傑傳載有左威衛大將軍權善才右監門中郎將范
懷義誤斧昭陵柏高宗詔誅之仁傑力爭其不應死高宗意解遂
免其死可見治獄務在持平朕辦理庶獄從不稍存畸輕畸重之
見固無事拘泥史冊然亦不妨援古以例今滿斗律當論斬原不
能曲爲之貸而平情度理尙不至於決不待時滿斗著從寬改爲
應斬監候秋後處決餘依議並將此通諭知之○丁亥諭尙書豐
昇額昨在金川奮勇著績克紹祖風且能勉承伊父阿里衮忠誠
素志曾降旨於果毅公爵加繼勇二字以示獎勵所有阿里衮原
襲公號亦著加此二字用昭世臣濟美○命阿桂爲武英殿大學
士兼禮部尙書以刑部尙書英廉協辦大學士○調永貴爲吏部

尙書以富勒渾爲禮部尙書三寶爲湖廣總督王亶望爲浙江巡撫王廷贊爲甘肅布政使由甯夏道遷○庚寅定協領不兼本旗佐領例○甲午 舒妃薨

六月乙未朔 上至西花園 舒妃金棺前奠酒○江南陶莊新

建 河神廟成 上親製碑記文曰成大事者必有其時事有視

若易盡人力而爲之然終於弗成者則以 天弗助 神弗相而

非其時也事有視若難盡人力而爲之而終於有成者則以 天

所助 神所相而適逢其時也雖然 天助也 神相也無所爲

告之者也使時有可乘而人弗盡力而爲之亦難望其有成也故

舉大事必當審事機乘時會盡人力以敬祈 天助 神相則庶

乎奏平成之功三者不可闕一焉吾於陶莊引河益信此理之不

爽陶莊之士仙河南流近清口蓋始自宋時南徙歷元及明不知

其幾何年矣於是有黃水倒漾之患於是有藉清敵黃之說然而清水常弱黃水常勝雖劬補且終不能得其要領而倒漾自若也惟我 皇祖聖祖仁皇帝首見及於此康熙己卯歲南巡時卽命開陶莊引河俾遠避清口以除倒灌之患誠金底抽薪之計也其後庚辰歲辛巳歲壬辰甲午歲以及雍正庚戌歲歷代河臣屢挑屢淤於是引河之事遂置而弗論逮乾隆己未歲予命大學士鄂爾泰視河仍持開引河之義而河臣河員率以爲難行高斌向稱爲善治河者亦以爲功不易就乃創建木龍挑溜北趨圖補偏救弊之爲於是引河之事更罷而無有言及者矣然予以爲陶莊之引河不開終無救清河倒灌黃流之善策但南巡四次未至其地用是耿耿於懷適昨歲東巡河臣吳嗣爵蘇州撫臣薩載各來覲因見嗣爵老病遂以薩載易之與之談及河務以爲海口淤泥

之說終難行至陶莊引河則必宜開而未敢必也命其抵任悉心
相視及薩載之任與督臣高晉親履其地測量高下曲直頭尾寬
窄繪圖貼說以聞朕復詳酌形勢以硃筆點記往返相商者不啻
數次議既定迺於去歲九月十六日興工以今歲二月十五日乘
春汛水長之候放流入新河而舊河築攔黃壩以禦之既放之後
新河順軌安流直抵周家莊始會清東下去清口較昔遠五里於
是永免倒灌之患而引河之工成夫自康熙己卯逮今乾隆丁酉
歷七十餘歲屢舉而未成及一舉而遂成者豈非時有可乘不可
乘之殊而總賴 天助 神相之所致耶其能劼毖籌畫盡人力
而不失事機任投艱而弗猶豫者則錫賚酬勳國家之典具在至
夫 天恩之賜助蓋自始事以迄成功予實晝夜在心默叩禱謝
無可言喻而 河神之佑相非特建崇祠其何以顯明貺達羣誠

乎爰卽新口石壩建廟安 神俾司事者春秋潔祀以邀惠於無
窮並爲迎 神送 神之詞以協律焉河之舊兮本南每灌清兮
黃兼 神之相兮北漸卽運河兮賴永恬迎 神之樂兮俎豆甘
於萬斯年恩沛覃右迎神樂河之新兮移北旣避曲兮就直 神
之相兮南塞去清口兮無復偁送 神之還兮帷幕飾於萬斯年
恒戴德右送神樂○戊戌江南河道總督薩載覆奏查三代時河
未南行自漢以後入淮旋塞仍北行入海至宋紹熙五年河徙陽
武分二派一由北清河入海一由南清河入淮黃河南行自此始
明宏治六年河全南行正德四年河決曹縣注豐沛經邳宿自桃
源三義鎮入口繞清河縣舊治後會淮係在陶莊迤北嘉靖初三
義口塞河流南徙出清河舊治前與淮水會小清口卽今清口係
在陶莊以南得旨朕之陶莊新河碑語大槩弗錯知道了○庚子

諭據顏希深奏湖南正佐雜職率多舍其本任調署別缺轉將本缺改委別員署理更有將苗疆人員亦調署腹內之缺又如吏目典史例不出差湖南則屢有差委任意更替地方之廢弛公事之闕茸未必不由於此見在督同司道澈底查明分別釐正以專責成等語所奏是州縣佐貳等官自應各就各任實心辦理使地方官久於其任事有責成心無幾倖方於地方有益卽或因人地相需繁簡各異及本任遇有緊要案件必需能員審辦者該督撫酌量人才臨時調署會辦原屬例所不禁若任意更調通省皆然則督撫既得藉以市恩並恐開屬員僥倖營求之漸其所繫於吏治官方者甚鉅顏希深既有此奏不可不徹底查辦著交顏希深秉公確查若通省調署各員如顏希深所奏情節不過十之二三尙可無庸置議若調委署任之事多至過半則是敦福自取愆尤卽

應據實參奏將敦福交部治罪而陳輝祖見署督篆亦難辭咎自應一併交部議處蓋督撫初任封疆者多陳奏公事以見留心地方如四川必言嚴拏嘔匪貴州必言安輯苗疆江蘇必言禁米出洋之類幾成故套迨日久相忘又蹈前轍而後來者復從而議之以見整飭顏希深旣爲此奏卽當實力爲之勿致始勤終怠至調委紛紜之事恐不獨湖南一省爲然他省或有相似者著該督撫一體留心妥辦○諭軍機大臣等據顏希深奏湖南吏治情形所稱州縣佐雜調委過多之處已明降諭旨交顏希深查辦矣至所奏上司旣明以姑息市私恩下屬遂漸以逢迎開捷徑地方之廢弛公事之闕茸未必不由於此等語果爾則湖南吏治幾不可問必當徹底確查以定其言之虛實阿桂由滇回京湖南乃必經之路著傳諭阿桂於過湖南時嚴密訪查果有廢弛闕茸實蹟卽行

據實具奏諒阿桂必不肯稍爲徇隱也將此由六百里諭令知之
顏希深原摺及朕所降之旨並著鈔寄閱看尋奏臣過湖南細訪
敦福官聲尙無不好至州縣調委過多誠不獨該省卽雲貴亦然
緣逃兵處分綦嚴一年未獲不得不調他處保全人材又衝途差
繁酌調節僻以均苦樂至佐雜亦多委署未免瞻徇得旨皆是公
論知道了○丙午諭前此批閱通鑑輯覽以石晉父事遼國而宋
徽欽之於金亦稱臣稱姪舊史於兩國構兵皆書入寇於義未協
因命用列國互伐之例書侵以正其誤並以大旨批示簡端今館
臣校勘刻本復因當時所改僅自石晉爲始其朱梁後唐諸代尙
未一律改正將書內應改之處黏籤進呈已照所請行矣朕之釐
正書法一秉至公非於遼金有所偏向蓋歷代相承重在正統如
匈奴在漢頡利在唐凡與中國交兵自宜書寇以正大一統之義

卽宋室運際陵夷然自徽欽以上共主位號猶存書法尙宜從舊
若五季時中國已瓜分瓦解不獨石晉爲遼所立卽梁唐諸代亦
難與正統相衡猶之南宋以後不得與漢唐北宋並論也且朕意
在於維持正統非第於歷代書法爲然洪惟我 國家開創之初
當明末造雖其國政日非而未及更姓改物自宜仍以統系予之
至本朝順治元年定鼎京師一統之規模已定然明福王猶於江
南僅延一綫故綱目之編及通鑑輯覽所載凡我朝與明交兵事
蹟不令槩從貶斥而於甲申三月尙不遽書明亡惟是 天心旣
已厭明福王又不克自振統系遂絕若唐桂二王之竄徙無常亦
如宋末曷昞之流離瘴海並不得比於高宗南渡之偏安蓋能守
其統則人共尊王失其統則自取輕辱實古今不易之通義也朕
評論及此惟準以大中至正之道爲天下萬世嚴子奪卽以是示

創懲且使我世子孫咸知恪守神器兢兢業業常保此統緒以
綿億萬載丕丕基所爲詒謀垂裕之道亦卽在是也將此明降諭
旨俾眾共知之○庚戌欽差大學士阿桂大學士管雲貴總督李
侍堯覆奏緬匪幼酋新立又與暹羅等國連歲搆兵上年聞蕩平
金川因商辦還人貢象後因檄諭嚴正屢次擲還稟詞益加畏懼
此決計送還蘇爾相等實情報聞○甲寅諭軍機大臣等侍郎彭
元瑞以所得明臣史可法畫像及其札藁合卷進呈朕親製詩一
章題於卷端命廷臣和韻並命大學士于敏中書御製書事一篇
及史可法復攝政王書於卷茲另爲裝潢篋貯著發交寅著令將
此卷弄於揚州梅花嶺史可法祠中並將卷內所有詩文畫像札
藁勒石祠壁以垂久遠至此卷如有願求展閱者亦聽其便但當
加意護守勿致有污損將此傳諭寅著知之 御製書明臣史可

法復書睿親王事文曰幼年卽羨聞我攝政睿親王致書明臣史可法事而未見其文昨輯宗室王公功績表傳乃得讀其文所爲揭大義而示正理引春秋之法斥偏安之非旨正辭嚴心實嘉之而所云可法遣人報書語多不屈固未嘗載其書語也夫可法明臣也其不屈正也不載其語不有失忠臣之心乎且其語不載則後世之人將不知其何所謂必有疑惡其語而去之者是大不可也因命儒臣物色之書市及藏書家則亦不可得復命索之於內閣冊庫乃始得焉卒讀一再惜可法之孤忠嘆福王之不惠有如此臣而不能信用使權奸掣其肘而卒致淪亡也夫福王卽信用可法其能守長江爲南宋之偏安與否猶未可知而况燕雀處堂無深謀遠慮使兵頓餉竭忠臣流涕頓足而歎無能爲惟有一死以報國是不大可哀乎且可法書語初無詭譎不經之言雖心折

於睿王而不得不強辭以辨亦仍明臣尊明之義耳余以爲不必
諱亦不可諱故書其事如右而可法之書並命附錄於後夫可法
卽擬之文天祥實無不可而明史本傳乃稱其母夢文天祥而生
則出於稗野之附會失之不經矣 御製題史可法像詩曰紀文

已識一篇篤子諡仍留兩字芳凡此無非勵臣節監茲可不慎君
網像斯觀矣牘斯撫月與齊而風與光並命復書書卷內千秋忠

蹟表維揚○乙卯轉和珅爲戶部左侍郎調金簡爲戶部滿右侍

郎由戶部漢
右侍郎調

○以董誥爲戶部右侍郎○調劉浩爲工部漢右侍

郎由工部滿
右侍郎調

以舒常爲工部右侍郎由署四川
提督遷○己未 上詣

黑龍潭祈雨○庚申諭向遇鑾儀衛漢鑾儀使員缺兵部將本衛

冠軍使及外任提督總兵論俸開列十員請簡此舊例也提督爲

專閫大員由朕特簡補授若人地非宜及年力衰邁者斷難姑容

無留俟改補鑾儀使之理嗣後漢鑾儀使缺出兵部止須將俸滿之總兵九員註明年歲及有無事故同俸深冠軍使一員開列進呈俟朕簡放其提督一項毋庸開列著爲令○辛酉京師雨○壬戌諭科場外簾各官子弟迴避之例節經御史條奏禮部議覆准行其中尙有未甚允協者如監臨知貢舉監試提調總辦場內一切事務其受卷彌封謄錄對讀收掌等官亦各有承辦試卷之責自應令其子弟迴避以杜弊端若兩翼副都統參領章京不過入場彈壓事畢卽行出闕與考試文字毫無干涉至供給等所不與士子相見卽順天府所委之巡綽等官止於號外巡查不能進號關照又如甌門御史點名後例不入場亦可毋庸防範所有副都統參領章京甌門御史及供給巡綽等官嗣後俱不必迴避卽自今年爲始著爲令